

CARTA DE PRESENTACIÓN

El Xixón que queremos



Llegamos a un nuevu día de celebración democrática, de compromisu ciudadanu col futuru del nuesu conceyu y de la nuesa ciudá, Xixón. **El prósimu 27 de mayu la ciudadanía de Xixón ta convocada a participar nun actu que va definir les línies polítiques de Xixón durante los próximos cuatro años, un actu que nun ha ser mecánicu sinon reflexivu,** adoptando consciencia e ilusión na decisión adoptada nel momentu d'exercer el derechu que mos convierte en ciudadanos y ciudadanes. Sabiendo asina mesmo qu'esti exerciciu de ciudadanía nun ye un cheque en clanco, nin una cesión de la nuesa participación ciudadana, esi derechu ha exércese a lo llargo de los próximos cuatro años de llexislatura, los y les xixoneses tenemos el derechu y el deber de participar como axentes activos nes polítiques que se

desenvuelvan na siguiente llexislatura.

El programa que tienes nes tos manes ye'l frutu de la reflexón, del compromisu de los homes y muyeres d'Izquierda Xunida -Bloque por Asturias-Los Verdes d'Asturies de Xixón tenemos pa cola ciudá y conceyu de Xixón. Esti programa ye'l productu del contactu diariu coles asociaciones de vecinos y vecines, coles asociaciones de padres y madres, coles asociaciones xuveniles, colos homes y muyeres de la cultura, colos sindicatos, en definitiva cola ciudadanía de Xixón, a la que mos debemos y cola que trabayamos nel día a día, d'otru mou nun sería posible redactar les nuses propuestas de gobiernu.

Apostamos por Xixón, tamos convencíos de qu'esti ye'l momentu de plantegar, y desenvolver, les polítiques más eficaces pa garantizar el derechu de la nuesa ciudadanía a un **emplegu de calidá**, qu'evite la emigración de la mocedá. Más emplegu estable, más calidá y más derechos pa los y les trabayadores de Xixón signifiquen una apuesta pol nuesu futuru, pol futuru de Xixón con un **Plan Industrial d'Asturies**, defendiendo la nuesa industria tradicional, el **compromisu colos Astilleros y el Tallerón** qu'hai que conservar nos espacios actuales, como suelu industrial al pie de la mar.



Na mesma llinia consideramos que **Mareo** tien de seguir siendo Verde Deportivo y la mazana de **Capua** xunta a otros edificios de la **cai Xovellanos** manetenese ensin recrecíu.

Como mediu pa evitar la emigración xuvenil, amás d'emplegu, hai que facilitar l'exerciciu del **derechu a la vivienda**, pa ello **apostamos pola construcción de 5.000 nueves viviendes de proteición**, l'adopción de medíes pa favorecer la puesta nel mercáu d'alquiler de les viviendes. **L'apuesta pol Tranvía al Sur**, complementariu col tresporte esistente, el tresporte pa los nuevos barrios de la ciudá, l'apuesta por un mediu ecolóxicu que va permitir una visión de Xixón. Presentámosmos col compromisu d'elevantos los niveles de bienestar de la nuesa ciudadanía, **apostando como siempre ficimos polo públicu** (Empreses Municipales, Fundaciones Municipales, enseñanza, sanidá...). **Meyorar la calidá de vida de Xixón** dende la meyora del nuesu mediu ambiente, como elementu esencial de la calidá de vida.

Consideramos a Xixón como la capital cultural d'Asturies, l'actividá cultural, los y les artistas de Xixón figuren ente los y les meyor valoraos y valoraes del estáu. Xixón como capital del cine asturianu ye l'emplazamientu más afayadizu pa la **Filmoteca d'Asturies** y pa ello proponemos el futuru **Centru Cultural de Cimavilla** seya la sé d'esta institución emblemática a la que se-y niega un espaciu adecuáu.

Somos xixoneses porque somos asturianos y asturianes, nun podríamos entender Asturies ensin Xixón, lo mesmo que nun podríamos entender Xixón ensin Asturies. Poro consideramos que les nuses propuestas nun sólo afecten a la nuesa ciudá, al nuesu conceyu, sinon que contribuyen a un meyor futuru p'Asturies. La nuesa visión nun ye localista, apostamos por **una Asturies fuerte con Xixón como elementu motor**, colos máximos niveles de competencias, qu'apueste pol reconocimientu de tolos derechos ciudadanos, que reconozca los derechos llingüísticos y culturales. Creemos nuna Asturies como país nel marcu d'una República Federal.

Nun podemos, nin queremos, escaecer a los homes y muyeres que defendieron los valores y la llegalidá republicana. A aquellos y aquelles asesinaos y asesinaes, que sofrieron la tortura, la prisión, pol so compromisu cola defensa d'una República de ciudadanos y ciudadanes de toles clases. Facemos de nueso la so llucha por una sociedá meyor, por una sociedá participativa, polos derechos civiles, por una sociedá llaica, por una sociedá republicana.

Nesta perspectiva va la nuesa propuesta de situar el **Centru de Memorial Histórica** nel edificiu de l'antigua Tabacalera en Cimavilla.

Pa ello ye necesario dotar a l'alministración más averada a la ciudadanía tea dotada de competencias y recursos pal exerciciu de les mesmes. Poro apostamos por un nuevu **Pactu Local** qu'asegure que l'Ayuntamientu tenga toles competencias que como Alministración más cercana a la ciudadanía ha ejercer, un nuevu Pactu qu'asegure la garantía de la calidá de los servicios públicos, **un Pactu pa un Xixón fuerte, pa un Xixón de futuru**.



gana xixón

Diciemos que nun podíemos entender Xixón ensin Asturies, como tampoco podemos entender a Asturies fuera del contestu internacional. Apostamos por una Europa de la ciudadanía, por una construcción europea na que la participación de los y les ciudadanos seya un fechu, por una Europa de los pueblos. Seguimos ratificándonos na nuesa apuesta pola paz, na nuesa llucha contra la Guerra y ocupación d'Iraq, la llucha contra la ocupación d'Afganistán, el compromisu cola llibertá de los pueblos saharauí y palestín, la llucha pola soberanía de los pueblos ocupaos. Unes lluches que nun llibramos col fusil si non cola pallabra.

Esti programa nun ye l'epicentru de recetas milagroses, equí esponemos **el nuesu modelu de ciudá**, el nuesu modelu de conceyu, el nuesu modelu de ciudadanía. El nuesu compromisu cola ciudadanía quedó claru durante l'anterior mandatu, un compromisu que vamos mantener a los llargo de los próximos cuatros años de gobiernu. Pa ello convidámosvos a participar, como ciudadanos y ciudadanes de Xixón, na fiesta de la democracia del 27 de mayu, sabiendo que los nuestos derechos de ciudadanía nun acaben si non qu'entamen esi día

Con más izquierda nel gobiernu vas ganar.



gana xixón

I. MODELU DE CIUDÁ

Les próximas elecciones del 27 de mayu de 2007 son encaraes por Izquierda Xunida-Bloque por Asturias-Los Verdes cola convicción de tener un modelu de ciudá alternativu que pon el centru d'interés nos ciudadanos y col covenciementu de que'l trabayu que realizamos durante los últimos cuatro años dende'l Gobiernu Municipal de Xixón faemos merecedores del sofitu de los ciudadanos ya qu'amosamos la capacidá de tresformación social de los Conceyos en manos de les izquierdes.

Los homes y muyeres d'Izquierda Xunida-Bloque por Asturias-Los Verdes defendemos un modelu alternativu de ciudá que fai de la sostenibilidad social y ambiental la so seña d'identidá, enfrentándose a la especulación urbanística y defendiendo una potente rede de servicios públicos de calidá que favorezan la igualdá d'oportunidaes de tolos/es los/es ciudadanos/es.

Defendemos ciudaes que construyan la convivencia dende'l respetu a la diversidá, la tolerancia y la solidariedá. Defendemos la creación de ciudaes con una dimensión humana que seyan espacios amables onde desenvolver la nuesa vida. Pero somos conscientes de que la desigualdá social na que vivimos treslládase con tola so crudeza a la ciudá y ye equí onde hai que poner la política y los medios pa l'abordar.

Izquierda Xunida-Bloque por Asturias-Los Verdes defendemos un Ayuntamientu fuerte, con capacidá política de decisión, con competencias y recursos económicos abondo pa poder atopar soluciones a los problemes sociales y ecolóxicos y contribuir d'esi mou a la creación d'una sociedá distinta y cada día más necesaria: más igualitaria, más tolerante, más abierta, más integradora, más solidaria.

Sabemos que tamos ente un momentu históricu trescendental na configuración del Xixón de nueso, con una estructura económica que ta determinando un cambiu na fisonomía de ciudá. La mayor parte de les y los xixoneses medramos y vivimos en barrios populosos, llevantaos a toa velocidá alredu de les grandes industries siderúrxiques o navales o talleres d'otra mena que surdieron al calor de la primer industrialización. Muchos y munches de los nuegos y nuseses vecines y vecinos avezáronse a planificar la so vida alredu de xornaes llaborales d'ocho hores (más, munches vegaes), a un mou de vivir y trabayar colectivamente, repartiendo'l so tiempu ente la fábrica y el llar. Nesos espacios compartieronse esperiencias que los axuntaron a compañeres y compañeros de trabayu y vecinos y vecines a la hora de lluchar por meyores nos sos barrios, pidiendo equipamientos...

Estes práctiques y vivencies dieron conteníu a lo que denominamos *conciencia de clase* y a la mesma noción de ciudadanía. Too esto marcó a la ciudá de nueso, mesmo na so estructura social como na so inclinación política, incluso en dalgo tan básicu ya importante como l'ociu y la sociabilidad.



Ye dicir, que la identidá qu'axunta a una inmensa mayoría de la nuesa población y la fai sentise pueblu y ciudá de Xixón, construyóse sobre la basa de la cultura de clase de los trabayadores y les sos industries; de la conciencia de clas d'homes y muyeres trabayadores: pescadores, campesinos, criaos, metalúrxicos, mineros, camioneros o ames de casa, nacíos equí o veníos d'otres partes d'Asturies o incluso de más allá: Lleón, Galiza, Extremadura o Andalucía..., que ficiéron de la de so una ciudá abierta, plural, mesmo popular qu'integradora; cohesionada y vertebrada polos sos movimientos de trabayadores, estructuraos n'organizaciones polítiques, sindicales, gremiales, vecinales ...

La terrible crisis industrial que vieno azotando dende los años setenta a tol mundu capitalista occidental, cebóse con rigor n'Asturies y Xixón, hasta l'estremu que podemos dicir que, dende'l puntu de la estructura económica, Xixón yá nun ye lo que yera. Si a esti datu, qu'encierra ensin dulda carácteres irreversibles, axuntamos el pesu de la cultura de globalización neolliberal, que nun para nel so determin d'impregnar y uniformar a los sos intereses mundos y persones, tenemos el frente qu'intentó romper el modelu de ciudá qu'heredamos de los nuestos mayores, nel que crecimos y pol que tamién caún de nosotres y nosotros, homes y muyeres d'izquierda, lluchamos.

Pero nosotros y nosotres queremos y proponemos a toles ciudadanes y ciudadanos de Xixón oponemos a la ciudá fecha d'aglomeraciones urbanes tan curiaes –non lo negamos- como compartimentaes y segregaes, onde se pierden los venceyos más averaos y entrañables cola realidá social y se mos fuerza a la retirada a espacios privaos cargaos d'aislamientu, inseguridá, desconfianza... Queremos y proponemos a toes y toos oponenos al intentu –práctica yá y nun sólo intentu- de recluyir n'aparatos burocráticos de xestión de los asuntos públicos la meyor tradición democrática y igualitaria animó les más lloables y fructíferes iniciatives del nuesu pueblu... Queremos y proponemos al pueblu de Xixón rechazar que la nuesa yá nunca más va ser una *ciudá industrial con servicios*, sinón una ciudá industrial y *de servicios*, pa intentar vendenos a la fin una ciudá de servicios con dalgunes industries, servicios vendíos como «packs» de salú, educativos, culturales, d'ociu, turísticos, eso sí, con pretendíos sellos de calidá global, preparaos yá pa consumir, incluso ensin calentar primero...

Con esos oxetivos tuvo presidía l'actuación de nueso nel Gobiernu Municipal durante estos 4 últimos años, y p'afondar nos mesmos ye pa lo que te pidimos el to sofitu y la to participación activa.



II. UN AYUNTAMIENTU FUERTE, CON RECURSOS Y PARTICIPATIVU

Ye difícil, pero non utópicu, preservar lo meyor de la nuesa historia política, social, cultural y económica, enriqueciécola respuesta crítica y creadora a los retos insoslayables del presente. Ye posible una ciudá que conservando cuanto enzarra el «Xixón del alma» que tantu queremos, entovía medre hacia'l futuru con instituciones municipales que creen condiciones pa xenerar riqueza y seyan un instrumentu de redistribución de la mesma, de xestión democrática de los espacios públicos, d'integración de los nuevos y nueves xixoneses...

Falamos d'un Ayuntamientu qu'intervenga, que coordine, que s'amuese sensible a les necesidaes, demandes, propuestes, presiones d'una rede creciente d'organismos ciudadanos; promotor y xestor d'un nuevu y dinámicu sector públicu; d'un habitat urbanu carauterizáu polos equipamientos colectivos, que faga difícil el trunfu de l'amenaza persistente de la segregación y división social; que nun asista como llorona y mendicante a la desertización industrial...

Reivindicamos el conceutu republicanu de ciudadanía, qu'inclúi pero nun s'agota na participación institucional, que considera la ciudá como un espaciu común d'alcuentru y discusión, que da conteníu al venceyu social que mos convierte en conciudadanos, que fomenta la iniciativa privada y venceya'l so éxitu a lo públicu, qu'esixe condiciones llaborales y medioambientales sanes, n'ámbitos llimpios y acoyedores...

Y superando la visión estrecha del localismu. Somos asturianos y asturianas porque somos xixoneses, nun concebimos Xixón ensin Asturias, nin Asturias ensin Xixón, de manera qu'esa perspectiva tien de tar y pa nos ta mui presente na conciencia, voluntá y compromisu como ciudá y pueblu de Xixón.

Esti ye'l Xixón de siempre y el del futuru, pol que convidamos a apostar a toes y toos.

Pa Izquierda Unida-Bloque por Asturias-Los Verdes, l'apertura y crecimentu hacia'l Xixón del sieglu XXI, ye desafío, xera y meta de toes y toos, xera que tien de pilotar un Ayuntamientu concebíu como conceyu nel plenu sentíu del términu, como conxunción de voluntaes y capacidaes, con polítiques actives en tolos campos, dende'l compromisu con too y toos/es, y aplicando'l principiu de discriminación positiva a favor de los sectores más débiles de la población.

II.1. DESCENTRALIZACIÓN, DEMOCRATIZACIÓN Y PARTICIPACIÓN

Esti Conceyu que reivindicamos y esiximos ha tener como elementos clave la descentralización, la democratización y la participación ciudadana corresponsable y solidaria.



Pasaos yá más de 27 años dende les primeres elecciones municipales democrátiques la situación de los Ayuntamientos sigue siendo precaria. Nel conxuntu del Estáu los conceyos malapenes xestionen el 13% del gastu públicu mientras les CC.AA aumentaron la so participación hasta'l 37%, y l'Estáu central sigue disponiendo del 50% correspondiendo'l 23% al gastu en Seguridá Social.

L'alderique de la descentralización, que nosotros/es siempre consideramos prioritariu, quedó sistemáticamente estancáu poles reformes estatutaries ensin que nunca se considerara por parte de los dos principales partíos que la segunda descentralización, la municipal, yera la prioritaria

La descentralización tien de facer efectivu'l principiu de subsidiariedá, que significa que seya l'Alministración más averada posible a les ciudadanes y ciudadanos la que, salvaguardando los principios de planificación, eficacia y eficiencia, desenvuelva les funciones y servicios qu'inciden nes sos condiciones de vida.

La democratización permite un control, estrechu de l'actividá de los órganos de decisión política y favorez la implicación activa na toma de decisiones por parte de la ciudadanía; ye dicir, garantiza la participación que va ser más eficaz cuanto más corresponsable y solidaria seya.

Optamos entós, dende Izquierda Xunida-Los Verdes-Bloque por Asturias por Conceyos fuertes y autónomos y con recursos porque creemos qu'asina pueden abordar meyor los problemes de los nuesos y nueses conciudadanos y conciudadanes. **Y pa ello ye afayadizu un nuevu Pactu Llocal que garantice un Ayuntamentu fuerte con competencias y recursos.**

II.2. EL PACTU LLOCAL

Fálase muncho de Pactu Llocal, pero poco s'avanza nel so desendolcu. Nos últimos tiempos el PSOE presentó un anteproyectu de Llei Básica del Gobiernu Llocal que ye claramente insuficiente porque nun prebé un nuevu modelu de financiación, l'esquema d'organización municipal que plantea ye escesivamente presidencialista y les competencias municipales tán poco definíes.

Pa nosotros urxe y urximos un reordenamientu de l'Alministración Llocal sobre estes exes:

- **Subsidiariedá**, que demanda pal Ayuntamentu toles competencias que por averamientu, eficacia y capacidá de xestión se pueden prestar nes meyores condiciones pa los y les ciudadanes..
- **Claridá competencial**, qu'estableza'l marcu de competencias esclusives y comparties ente les diferentes Alministraciones, definiendo cómo les xestionar atendiendo a los principios d'autonomía, collaboración y cooperación, fixando los sos costes y asegurando la so financiación.
- **Suficiencia financiera**, que garantice al Ayuntamentu los recursos afayadizos pa cumplir les funciones que se-y asignen, qu'ha venir de la participación de los Ayuntamientos nos tributos del Estáu y d'Asturies.



- **Garantía de calidá de los servicios o servicios públicos de calidá**, configurando un auténticu *sector públicu llocal*, que xuegue un papel activu y dinamizador nel desendolcu económicu y social.

Con estos criterios, nada nun hai ayenu de cuanto afeuta direutamente a los ciudadanos que nun seya de competencia municipal, bien n'esclusiva o compartida con entes supramunicipales, básicamente Asturias y l'Estáu.

II.3. LOS RECURSOS-FINANCES LOCALES Y FISCALIDÁ ECOLÓXICA

El desarrollu de l'actividá municipal requier un marcu financieru que permita la prestación de los servicios a la ciudadanía. Anguaño la fiscalidá municipal alcuéntrase mui llendada pola Llei de Haciendes Llocales. Un recursu fundamental pa los Ayuntamientos nel modelu de financiación vixente son les tresferencies del Estáu con cargu a los Presupuestos Xenerales. Dada la creciente cantidá y calidá de servicios prestaos, los nuestos Ayuntamientos sofren una situación d'insuficiencia financiera permanente.

Dende'l nostru puntu de vista resulta imprescindible correxir estes condiciones ditando a los Ayuntamientos de recursos públicos abondo y afayadizos a la realidá de los servicios ufríos, al tiempu que se xeneren dinámiques d'equilibriu social y medioambiental. Defendemos un modelu fiscal progresivu y ecolóxicu que faga compatibles l'equilibriu social ("paga más el que más tien) y medioambiental ("quien contamina paga").

Pero a la medra de competencias y la garantía de claridá nos bienes y servicios a prestar, son impensables ensin les acompañar de recursos financieros, ensin incrementar esi raquíticu 12 o 13% de participación municipal nel conxuntu del gastu públicu, averándonos hacia'l 33% en que se sitúa la media de los países europeos más desarrollaos. Pa ello ye necesariu:

- Incrementar la **participación nel Presupuestu y Tributos del Estáu**, con elementos correutores que garanticen un repartu equitativu en función de la población y l'equilibriu territorial y social ente los conceyos.
- **Participación nos Tributos d'Asturies**, teniendo en cuenta los costes efectivos de los servicios y los criterios de calidá con que s'han facer.
- Avanzar hacia **nueves figures impositives que graven**, ente otros, la utilización del suelu, subsuelu y vuelu, del espaciu radioeléctricu, la ocupación de la vía pública o la tenencia de viviendes desocupaes davezu.

Persiguiendo la redistribución de la renta disponible y la suficiencia financiera, los principios qu'han inspirar esti repartu de recursos son la subsidiariedá, equidá, progresividá, corresponsabilidá, armonización y coordinación fiscal interadministrativa.



II.4. PRESUPUESTOS PARTICIPATIVOS

Pa potenciar el papel dinamizador del Ayuntamiento como factor xenerador de riqueza y distribuidor equitativu de la mesma con bienes y servicios, pa mantener y enanchar los derechos sociales, pa crear hábitats físicos, sociales y culturales col máximu nivel de calidá son precisos ingresos públicos; ye necesariu un sistema fiscal fuerte y xustu, qu'obligue eficazmente a pagar según ingresos y beneficios reales y más a quien más tien; pero tamién ye necesariu'l control rigurosu del gastu públicu, la so reorientación y evaluación, que tentu más eficiente va ser cuanto más cuente cola participación ciudadana. Ye lo que reivindicamos cuando falamos de presupuestos participativos.

Trátase de que los ciudadanos y ciudadanes sepamos d'onde provienen los nuestros ingresos municipales y decidamos sobre les prioridaes d'inversiones públiques, valorando la trascendencia social, urbana y ambiental de les mesmes, controlando la so execución y verificando efectivamente lo fecho. Como mínimu y pal próximu mandáu electoral vamos tratar d'algamar que s'aplique esti **criteriu participativu al 33% del presupuestu d'inversión.**

II.5. CONSEYOS DE DISTRITOS

Enantes de la entrada en vigor de la Llei de Midíes pa la Modernización del Gobiernu Local, que daba derechu a la constitución y funcionamientu de los Consejos de Distritu, dende la izquierda xixonosa yá los considerábemos una "asignatura pendiente" pol so **altu grau de política social y ciudadana qu'aportaben.**

Izquierda Xunida-Bloque por Asturias-Los Verdes consideramos que **se tien de fortalecer estos instrumentos de participación hasta facelos verdaderos órganos de decisión popular,** pa lo que s'han dotar nueves competencias (participar na elaboración de los presupuestos municipales por exemplu) y se tien de meyorar la so comunicación con tolos colectivos y entidaes del Distritu, fomentando d'esi mou alcuentros que permitan analizar idees y proyectos.

III. UN XIXÓN TAMIÉN PA TRABAYAR

Si bien ye ciertu que les polítiques ya iniciatives de desendolcu económicu y d'emplegu nun son d'estricta competencia municipal hai yá munchos años que constituyen un apueste d'Izquierda Xunida de Xixón, primero dende los Pactos pol Emplegu algamaos colos sindicatos CC.OO y UXT, y depués a través de toa una política activa d'emplegu de la que la so paternidá –o maternidá, val el casu- ye ensin duda de nueso..

Queremos nos próximos 4 años seguir insistiendo nesta vía, que paez qu'entama a dar bonos frutos, dada la baxada del nivel de desemplegu de los últimos años na nuesa ciudá, reforzando les polítiques actives d'emplegu, en permanente alcuerdu colos sindicatos de clas de la nuesa ciudá.



Nel nuesu Programa Electoral de 2003 afirmáremos “Agora l’Emplegu”. Creemos firmemente que durante estos cuatro años pusimos los pegoyos p’algamar esi oxetivu. Poro güei dicimos “Más Emplegu Estable, de Calidá y con Derechos”.

Pa Izquierda Xunida-Bloque por Asturias-Los Verdes trátase d’apostar por un modelu de desendolcu social y económicu sostenible pa lo que ye necesario nun sólo l’adopción d’estratexes pa la creación d’emplegu, sinón que tamién son necesaries Midíes pa la implantación de nueves industries na ciudá de nueso, que posibiliten la creación d’una riqueza que garantice una xusta distribución de la mesma.

III.1 FAVORECER LES INVERSIONES PRODUCTIVAS

Izquierda Xunida-Bloque por Asturias-Los Verdes tien claro que les necesaries inversiones productives precisen ensin escusa de:

- **Suelo**, por supuestu suelu industrial, suelu de calidá, baratu y hasta de baldre en función de la inversión y emplegu garantizáu. Esa foi una de les nueses prioridaes a la hora d’afrentar l’adautación del PSGOU a la Llei del Suelu del Principáu d’Asturies 3/2002 de 19 d’abril. La puesta en marcha en Serín de la Zona d’Actividaes Lloxístiques d’Asturies (ZALIA) tien de ser una oportunidá pa la instalación de nueves industries na nueva ciudá, onde se contemple l’equilibriu d’estes industries col mediu ambiente.
- Adecuada **ordenación del territoriu**, que, dende un planteamientu interterritorial, facilite ubicaciones, fácil comunicación ente elles, accesos-salides rápidos y cómodos mesmo pa proveedores y consumidores próximos y llonxanos. Nesi sen seguemos pensando na necesidá d’abordar d’una vegada la construcción d’una ronda que comuniquel nuevu Puertu d’El Musel coles zones industriales del oeste del conceyu, que tien de pasar per Aboño.
- Desendolcu **d’Infraestructures físiques** como l’actual ampliación del Puertu d’El Musel, la mayor obra pública fecha n’Asturies, na que na so configuración xugó un papel trascendental Izquierda Xunida rechazando l’alternativa 3C que con obstinación defendió en solitariu’l PSOE na pasada llexislatura. Amás seguemos creyendo que ye necesario la conexón del Puertu cola rede de ferrocarriles que permitan una salida/llegada rápida de productos dende la Meseta.
- Dotación de cuantes **Infraestructures de servicios** d’investigación, tecnolóxicos, comerciales, sanitarios, turísticos, de xestión... demanda d’un polu de desendolcu. Nesta nueva etapa comprometémosmos a potenciar el Parque Científicu y Tecnolóxicu de la Universidá Llaboral que tien de convertise en referente pa toa Asturias.
- Siempre dientro d’un programa p’Asturies, **ordenación de la sociedá de la información**: plan de telecomunicaciones, Infraestructures (banda ancha, cable...) y aprovechamientu de los últimos servicios tecnolóxicos.



- Recursos humanos formaos afechiscamente, que va haber si curiamos la Formación Profesional y un desendolcu universitariu d'investigación creadora de sinerxes col entornu.

III.2 PLAN INDUSTRIAL Y ESTRATEXES DE REINDUSTRIALIZACIÓN

Un de los asuntos que constantemente supuso un esmolecimientu pa la nuesa organización nos últimos 4 años y que se treslladó de contino a la Xunta de Gobiernu, anque llamentablemente nun siempre pudieron ser solucionaos, non pola falta de compromisu sinón pola falta de competencias municipales, foi y ye'l procesu deprimente de la Industrial tradicional esistente na nuesa ciudá como **Mina La Camocha, Naval Xixón, Izar, Aeralia, Porcelanas, Crady ...**

Dende Izquierda Xunida-Bloque por Asturias-Los Verdes seguimos pensando y defendiendo **Xixón como polu industrial nel contestu d'un plan industrial p' Asturias**, a pesar y frente a tol procesu de desmantelamientu industrial qu'entovía sofre güei. Porque tamos convencíos que nun hai futuru pa esta ciudá nin p' Asturias al marxe de la industria.

Frente a los cantos de serena de dalgunos prebostes de la economía y la política neolliberal afirmamos que güei ye más necesario que nunca consolidar primero y estender depués un verdaderu texíu industrial n' Asturias.

Nel casu concretu d'**ARCELOR**, depués de tanta OPA hostile, que llueu resultó ser más qu'amigable, paez que la situación de la empresa tranquilízase, lo que nun pue llevanos a la relaxación. Vamos seguir esixendo'l cumplimientu de les inversiones prometíes, pa que la planta xixonesa de Veriña siga competitiva nel sector siderúrxicu mundial.

Respeutu de los **Astilleros** siguen siendo anuncia preocupante. De manera pendular, primero un y depués l'otru. Güei paez que la situación en **Naval Xixón** vuelve a ser complexa pola falta de pidíos. N'**Izar** les coses siguen ensin s'aclarar depués de los adquisición pola empresa viguesa Vulcano. En cualesquier casu, los dos respunden a un sector estratéxicu pa Xixón. Poro, si toos tamos d'alcuertu nello, nun añadamos más alderique innecesariu en cuantes a la so ubicación.

Dende llueu Izquierda Xunida-Bloque por Asturias-Los Verdes va defender que los astilleros sigan onde tán. Onde siempre tuvieron.

Al mesmu tiempu defendemos el desarrollu ya interacción ente toles industries esistentes (Arcelor, Dupont, Izar, Naval Xixón, Duro Felguera, Moreda, Suzuki, Esmena, Temper..., xunta a un importante númberu de PYMES), y *vamos favorecer la implantación d'otres nueves na Zona Lloxística de Serín.*

Va ser preocupación prioritaria pa Izquierda Xunida-Bloque por Asturias-Los Verdes, **la potenciación de toles inxenieríes creadores de nueves tecnoloxíes y diseños industriales, del Parque Tecnolóxicu**, dende esa mesma perspectiva del I+D+I, realidaes ambes qu'han tar pervenceyaes con tol aparatu productivu local/asturianu y cola Universidá.



L'Ayuntamientu de Xixón ta comprometíu col desarrollu local dende hai munchos años y son mui importantes los llogros algamaos, pero ye evidente qu'habemos esforzanos en seguir aplicando polítiques innovadores d'apoyu a los nuegos empresarios na so llucha de meyorar los sos niveles de competitividá.

El Séptimu Programa Marcu d'Investigación y Desarrollu Tecnolóxicu ye'l principal instrumentu de la UE pa financiar la investigación n'Europa y ta diseñáu pa responder a les necesidaes d'emplegu n'Europa y reforzar la so competitividá.

UN PACTU LOCAL COLOS EMPRESARIOS DE XIXÓN pa xestionar el Plan de Dinamización Empresarial, alreduro de los oxetivos que vienen darréu:

1.- Crear un marcu afayadizu en Xixón pa propiciar la incorporación de les PYMES al retu de la I+D+I y ayudales na elaboración de propuestes al VII Programa Marcu, facilitándoyos l'accesu a los diferentes programes y organismos.

2.- Facilita-yos l'accesu a los programes d'esportación y a les polítiques desarrollaes por Asturex, l'ICEX, les cámares de comerciu, etc.

3.- Máximu respetu a la creatividá y idegues de les empreses y les persones cuidando que naide nun s'apropie de les idegues ayenes, estimulando asina la presentación de propuestes imaxinatives por parte de les PYMES y incentivando, por últimu, la presentación de proyectos d'I+D+I acoyíos al Programa Marcu de la UE.

4.- Optimizar l'usu eficiente de los recursos que los diferentes organismos europeos, estatales, autonómicos y llocales ponen a disposición de los nuegos empresarios y empresaries pa meyorar la so competitividá, garantizando asina meyores resultaos que redunden a la so vez nun sólidu parque empresarial de PYMES en Xixón con mayores niveles d'emplegu estable y de calidá.

Esti plan va xestionase mediante una empresa mista con participación municipal y empresarial a partes iguales con implicación asinamesmo de la Cámara de Comerciu de Xixón, si los sos órganos de xestión lo consideren afayadizo a los sos intereses. Esta empresa habrá tener un plazu llimitáu na so duración hasta la fin del 7PM, ye dicir 2013.

III.3 SECTOR PÚBLICU

Izquierda Xunida-Bloque por Asturias-Los Verdes apuesta por un sector públicu municipal fuerte, renováu y democratizáu, que xuegue un papel activu y dinamizador nel desendolcu económicu y social.

Les empreses públiques, como exa de l'actividá productiva nel nuesu territoriu y cotarru, práuticamente desaparecieron. Con elles desaparecieron tamién los vieyos modelos que durante años primaron na economía asturiano y local. Mesmo como la so desaparición, llamentamos que mientres los tuvimos y siendo como yéremos conscientes de la so precariedá, nun creamos recambios, alcontrándonos a la fin ensin aquélles, ensin éstos y hasta faltos de tiempu pa crear nuevos modelos qu'esixan cambios teóricos, políticos y organizativos. Pero nin too esto xunto exímemos d'intentalo con pasión.



Na busca de nuevos horizontes, tenemos un campu inequívocu d'intervención pública nel urbanismu, la vivienda y el mediu ambiente, la educación, les polítiques de salú y servicios sociales, los servicios en xeneral, la cultura...

Ye'l nuevu sector públicu, con roles definíos y asignaos a les diferentes alministraciones, *el nuevu sector públicu qu'invierte n'Infraestructures, en vivienda, en recursos humanos, en calidá de vida, n'investigación y condiciones pal desarrollu (I+D+i, parques tecnolóxicos...), terrén abonáu pa un nuevu escenariu económicu y pa les inversiones productives*. Tamién dende esta perspectiva económica oponémosmos radicalmente a la privatización de servicios públicos.

Nesti campu nun sólo nun descartamos, sinón qu'esiximos, buscar la participación pública accionarial n'empreses como Arcelor, Hidrocantábrico, Gas Asturias..., que, xunta a la capacidá d'incidencia na toma de decisiones acerca de la realización d'inversiones necesaries, propicien la interacción col entramáu industrial local y del conxuntu d'Asturies.

III.4 OTROS SECTORES PRODUCTIVOS

Xunta a esta estructura industrial potenciada con esti sector públicu, son imprescindibles otros sectores como'l *turísticu, l'agroalimentariu, el pesqueru...* El mesmu esfuercu públicu que se ta faciendo en pro del primeru, del turismu, tenemos que lu facer col campu, la mar y cuantes industries se puedan promover venceyaes con ellos. Nunca nun van sustituyir el pesu del prioritariu calter industrial de la economía de nueso, pero ensin estos aquel pesu del sector industrial nun sería abondo pa sustentar por sí sólo la economía de nueso.

Por referinos a un sector víctima d'un endémicu abandonu por parte de toos, queremos dicir una pallabra sobre'l *mediu rural* nel nuesu programa. El mediu rural necesita obra pública (carreteres, asfaltáu, aceres, saneamientu, abastecimientu d'agua...), pero tamién tien otres necesidaes, como, por exemplu::

- **Creación d'un departamentu municipal dientro de l'Axencia de Promoción Económica empobináu a la xestión de programes específicos de formación y ayudes a los y les trabayadores del mediu rural del conceyu y al entamu de nueves actividaes agrícolas, ganaderes y forestales nel campu xixonés.**
- **Xestión de suficientes espacios públicos de baldre na ciudá pa la comercialización de los productos agrícolas del conceyu. Programes de sofitu a la venta.**
- **Supresión del canón de saneamientu pa les explotaciones agrícolas y ganaderes.**
- **Sofitu a la Caxa Rural Xixonesa, pegoyu financieru del mundu rural local.**
- **Creación del Conseyu Municipal Rural.**



Tampoco escaecemos la mar, los sos recursos y la so problemática. Izquierda Xunida-Bloque por Asturias-Los Verdes esixe y demanda al Principáu, Autoridá Portuaria y Cofradíes crear nesti sector, nel so potencial pa xenerar una riqueza que mos ye vital y nel mantenimientu d'unos puestos de trabayu aboslutamente necesarios pa la nuesa estructura económica y d'emplegu.

Y creyer nesti sector ye comprometese con él, afitando la so estructura empresarial, potenciando los sos recursos humanos con un **Plan de Reciclaxe y Formación Contínua**, y xestionando llinies de financiación pal oxetivu de xenerar riqueza, nun sólo de subsistir a partir de la piesca.

III.5 MÁS EMPLEGU ESTABLE, DE CALIDÁ Y CON DERECHOS

Tol planteamientu fechu d'inversión productiva direuta o indireuta, va redundar nel Emplegu. Insistimos: ésti xenérase cuando se xenera riqueza. Por supuestu, fai falta toa una política activa y belixerante col emplegu: axencia de promoción económica y emplegu, formación, planes locales, d'igualdá, de reinserción social; incentivos, cláusules d'obligáu cumplimientu pa la resolución de concursos municipales, convenios coles empreses, xeneralizar la xornada de 35 hores de trabayu por llei, etc.

Pero'l primeru que tien d'apostar de veres pol emplegu ye l'Ayuntamientu. Nos últimos años de Gobiernu Municipal de la izquierda plural fízose un importante esfuerzu por realizar una amplia Ufierta d'Emplegu Públicu, que meyore'l serviciu ciudadanu y que permita avanzar nun emplegu de más calidá y estabilidá. Nesa apuesta vamos continuar nos próximos años.

Dende Izquierda Xunida-Bloque por Asturias-Los Verdes creyemos que la meyor vía pa garantizar la igualdá d'oportunidaes nel accesu a un emplegu públicu ye'l de la Llibre Oposición, ensin perjuiciu de qu'en munches ocasiones, y atendiendo a llexítimos **derechos de personal eventual que lleva munchos años desenvolvendo un trabayu pal mesmu Ayuntamientu, se pueda contemplar la posibilidá d'un Concursu Oposición.**

Va apostase por un fortalecimientu y ampliación de los Planes Municipales d'Emplegu, ye oxetivu meyorar les condiciones llaborales englobaes dientro del Pactu "Xixón emprende", nun nuevu Pactu que supere al anterior.

A lo último ye un oxetivu pa la próxima llexislatura la necesidá de mantener unes rellaciones llaborales coherentes y coordinaes nel conxuntu del **Grupu Ayuntamientu de Xixón qu'esixe avanzar hacia la consecución d'un Alcuertu Marcu**



IV. LA PLANIFICACION URBANA: UN XIXÓN AMBIENTALMENTE SOSTENIBLE, TRANSITABLE Y HABITABLE

IV.1 URBANISMU YA INFRAESTRUCTURES

El modelu de ciudá puesta en marcha pola derecha desenvuelve un proyectu urbanu nel que primen los intereses económico-financieros frente a la redistribución social de la riqueza, la urbanización desbocada y el desarrollismu feroz que segrega a la población, con grandes sectores desfavorecíos y que llenda (y a vegaes pretende facer desapaecer) los espacios de propiedá colectiva que son los definen a la ciudá como espaciu de convivencia ciudadana.

Frente a esi modelu depredador Izquierda Xunida-Bloque por Asturias-Los Verdes defende un xiru radical concibiendo a la ciudá como un conxuntu complexu, como un proyectu de llibertá, solidariedá y responsabilidá ecolóxico.

Reclamamos un modelu de ciudá pa los ciudadanos/es nos que se garantice la so calidá de vida, la so llibertá y l'exerciciu de los sos derechos dende la corresponsabilidá y la sostenibilidá.

Pa nosotros y nosotres ye imprescindible falar de planificación. Porque queremos contribuir a facer ciudaes más habitables, más humanes, más integradores, más ecolóxicamente sostenibles y más igualitaries.

IV.1.1. Reequilibriu social y sostenible de la ciudá

P'algamar esto, en Xixón alcontrámosmos con dos series de desafíos: *el de lo nuevu y el de lo vieyo, por una parte y, por otra, el del reequilibriu social y sostenible de la ciudá frente a un plantegamientu de la mesma parcial y elitista*. Ensin ser el meyor de los posibles, dende la restauración democrática la izquierda xixonese (primero PCA, llueu IX güei IX-BA-LV) participó na elaboración de los distintos Planes Xenerales d'Ordenación Urbana puestos en funcionamientu, haciendo un gran camín que permite responder direutamente unes vegaes y otre crear condiciones pa una respuesta definitiva a mediu plazu, integrando un urbanismu qu'actúa como un correutor d'injusticies y como un redistribuidor de la riqueza mediuambiental y de la propia trama urbana. Pero entavía queda muncho por facer, por frenar la pulsión xeneralizada a especular colo que tendría de ser padreño de tola comunidá: el mediu ambiente (fachada a la mar, campiña, zones llimpies...), el suelu, la vivienda...

IV.1.2. El nuevu PGOU

L'aprobación definitiva de l'adaptación del PGOU a la Llei del Suelu del Principáu d'Asturies 3/2002 de 19 d'abril, ye, ensin que naide lo dulce, la garantía fundamental de que nos próximos años podamos afrontar la construcción de más de 5000 viviendes con dalgún réxime de protección pública al mesmu tiempu que se preserva la zona rural xixonese de la especulación urbanística.



Asina mesmo va permitir poner a disposición de les múltiples empreses qu'afortunadamente se quieren instalar na nuesa ciudá, suelu industrial abondo a un preciu razonable, lo que va garantizar ensin dulda esi futuru industrial que nosotros/es queremos pa Xixón.

Ye entós l'instrumentu básicu de planificación que-y va permitir construyir un Xixón nel que se facilite l'accesu a la vivienda, nel que se preserve'l Mediu ambiente y nel qu'amás se pueda trabayar.

IV.1.3. Centru y barrios

El centru de Xixón tien de ser concebíu como un padremóñu común de toos y tolos ciudadanos/es y visitantes, nel que s'instalen esos grandes centros lúdico-culturales pa disfrute de toos/es: Acuariu, Centru de Talasoterapia, Centru Cultural na antigua Fábrica de Tabacos en Cimavilla...

Al mesmu tiempu los barrios han ser contemplaos como hábitats comunitarios, con equipamientos sociosanitarios, deportivos, culturales, d'ociu y participación. **Un serviciu indispensable pa xeneralizar, dada, ente otres razones, la esperanza de vida que va algamando la sociedá de nueso y los nuevos modelos d'ociu de la nuesa mocedá son los servicios hixénicos (W.C.) públicos.** Y cuando falamos de barrios nun sólo mos referimos a La Calzada, L'Arena, El Polígonu, Nuevu Xixón, Roces...; tamién mos referimos a les parroquies rurales y a *pequeñes implantaciones urbanes como Montiana, Vega-La Camocha, El Muselín, La Braña, Veriña y otros.*

Izquierda Xunida-Los Verdes-Bloque por Asturias apuesta por una integración territorial, económica, social y cultural al máximu nivel posible. Pero tamién por eso, aplicando una vuelta más el criteriu de discriminación positiva a favor de los más débiles, sentimos y mos esiximos un especial compromisu con barrios nos que ye necesariu un mayor compromisu. En concreto, referímosmos a barrios como Tremañes, el barriu marxináu, marxinal y hasta marxinal crónicu; Veriña, Montiana o La Braña, desguazaes ente grandes industries, víes férrees, carreteres, ruines...; El Muselín o dalgunes parroquies rurales...

Por nun entrar nun detalle de les necesidaes de caún de los ámbitos territoriales referíos a favor de toos ellos Izquierda Unida-Bloque por Asturias-Los Verdes reivindica un Plan d'Integración Territorial Municipal, con unos obxetivos y actuaciones básiques correspondientes que seríen les que vienen darréu:

- **Abastecimientu d'agua y saneamientu integral:** tien d'acelerase'l procesu d'estender la rede d'abastecimientu d'agua a tol conceyu, en condiciones y precios proporcionaos a los niveles d'ingresos y consumos. Por otra parte, tien de se **xeneralizar el serviciu de saneamientu, bien acabando la so plena conexón col sistema colector del Plan de Saneamientu Integral de Xixón,** como ye'l casu de Los Campones en Tremañes, o con un saneamientu local igualmente integral, como reivindicamos pa otros barrios y parroquies. Nesti sen Izquierda Xunida-Bloque por Asturias-Los Verdes sigue esixendo **la construcción d'otra depuradora pa la zona Este de la ciudá que permita'l tratamientu de los desfechos de tola cuenca Este del conceyu.**



- **Rede viaria de comunicaciones interna y de conexón cola rede xeneral** local, intermunicipal o d'Asturies, con aceres, zones d'aparcamientu, señalización, mobiliariu urbanu, etc. Una propuesta concreta sería **crear un aparcamientu, fundamentalmente pa usu de residentes, na zona de les 1500 en Pumarín**, subterráneu o en superficie, teniendo en cuenta que en tou esti área los servicios esistentes nun tienen e términos xenerales garaxes.
- **Edificiu de Servicios Múltiples o polivalente**, que dea cabida a les dimensiones social, cultural, lúdica, sanitaria y d'atención municipal al ciudadanu, bien aprovechando equipamientos esistentes (antigües escueles, por exemplu) o de nueva construcción.
- **Política medioambiental**, que progresivamente vaya reduciendo los altos niveles de contaminación nunos casos (Tremañes, Montiana, La Braña, El Muselín...) y preservando n'otros un mediu ambiente sanu, persiguiendo en tolos ámbitos los vertíos contaminantes y vertederos ilegales.
- **Tresportes y otros servicios públicos**. Ye l'esmoecimientu de nueso averar los servicios a la ciudadanía y non obligar a ésta a peregrinar hacia los servicios, too ello dientro d'un estudiu y propuesta xustos a cada situación. En tou casu, que tolos barrios y parroquies tengan serviciu públicu de tresportes, dispensariu sanitariu fixu o móvil, escuela o tresporte escolar, son mínimos irrenunciabiles pa Izquierda Xunida -Bloque por Asturias-Los Verdes.

IV.1.4. Polígonos industriales

Nesti próximu mandáu esperamos ver cumplía la finalización de polígonos industriales como'l de La Peñona. Al mesmu tiempu l'ampliación d'otros polígonos industriales (Los Campones, Sotiello...) xunta cola puesta en funcionamientu de la ZALIA en Serín son la garantía de que la industria que nos últimos tiempos quier instalase na nuesa ciudá alcuentre fácil acomodu.

Izquierda Xunida-Bloque por Asturias-Los Verdes va promover alcuerdos coles Asociaciones d'Empresarios d'estos polígonos que favorezan el mantenimientu y desendolcu de los mesmos. **Al mesmu tiempu comprométese a buscar nueves rutes de la empresa municipal EMTUSA que permite una bona comunicación hacia esos Polígonos** que favoreza'l treslláu de trabayadores y usuarios y usuaries.



IV.1.5. Infraestructures

Evidentemente, Izquierda Xunida-Bloque por Asturias-Los Verdes reivindicuen les *infraestructures afayadices pal desendolcu sostenible d'Asturies y Xixón, pa la ordenación integrada y coherente del nuesu territoriu, pero tenemos que referinos a dalguna d'elles:*

- **Autovía d'El Musel per Xove, NON.** Sigúmosmos oponiendo a esi híbridu d'alternativa que se plantea d'accesu al Musel per dos boques: una al Sur per Xove y otra la Norte per Aboño. Pa nosotros y nosotres nun hai argumentos pa desechar la opción única d'Aboño que conectaría direutamente pela ampliación del puertu de Xixón pela Zona Norte, y esta boca portuaria cola d'Avilés, a través del corredor de Tabaza. Desdoblando dende l'Empalme hasta Avilés la carretera vieya AS-19. Denunciamos esa cerrazón, asina como que se tea dexando pudrir l'asuntu, pensando que nun mal clima siempre gana la opción del poder.
- **Metrotrén, un caprichu imparabile,** pesie a qu'algamamos que se prolongue hasta l'Hospital de Cabueñes seguemos considerando un gastu absurdu, qu'entovía nun ta aclariao quién va correr col so mantenimientu.
- **Soterramientu de les vías y eliminación de la barrera ferroviaria, Sí, pero hasta Veriña** y pa usu y disfrute de toes y toos, non sólo pa los que tengan un gran poder adquisitivu, como yá se dixere. La barrera ferroviaria supuso pa Xixón la dixebrá física ente los y les ciudadanos de les dos márxenes del recintu ferroviariu. Non solo se da esti fenómenu nel centru de la ciudá, sinón que s'estiende históricamente hacia la zona Oeste onde, nos últimos años acentuóse'l problema col crecimientu urbanísticu suxetu al PGOU en desendolcu. Izquierda Xunida-Bloque por Asturias-Los Verdes considera que'l Plan Especial pa la Integración del Ferrocarril na ciudá non elimina'l problema de la zona Oeste sinón que crea más barreres al non **soterrar de manera integral la estación intermodal de Moreda** y la rede ferroviaria hasta Veriña. Poro defendemos que'l soterramientu llegue hasta Veriña y que la estación intermodal se sotierre. Per otra parte, cola nuesa propuesta evitaríase la saturación del tráficu rodáu deriváu de la semipeatonalización de l'avenida de l'Arxentina, pero sobre too facilitaríase'l **desdoblamientu de Juan Carlos I**, dende Moreda a Veriña, eliminando un auténticu y crónicu cuellu de botella ente'l Centru y la Zona Oeste de la ciudá, y abriendo pel Norte una entrada-salida a los polígonos industriales.

IV.1.6. Tresportes

Claves pa Izquierda Xunida-Bloque por Asturias-Los Verdes son *los tresportes públicos*. Sobre ello, queremos enunciar dalgunos principios irrenunciabiles.

- Por un tresporte públicu y ecolóxicu, al serviciu de les persones, que son usuaries, non clientes.
- Protección de los itinerarios de los tresportes colectivos.



gana xixón

- Garantía de compatibilidad técnica y operativa de les redes esistentes: estación intermodal, billete únicu multiservicios, información en tolos medios de tresporte d'enllaces con otres ofertes de tresporte públicu.
- Accesibilidad pa toles persones con movilidad reducida o discapacitaos en tolos medios de tresporte.
- Potenciar los medios de tresporte alternativos: **víes arteriales pa bicicletes, rede de carriles pa bicicletes en toles grandes víes de comunicación urbana** o víes alternativos.
- Na medida de lo posible, avanzar hacia una concepción del espaciu urbanu que reduza la necesidá de desplazase.
- Non a la privatización de les empreses de tresporte públicu: RENFE, FEVE, EMTUSA o otres.
- Respetu de los espacios peatonales y restricción progresiva de la necesidá d'utilización del vehículu priváu nel interior de la ciudá.
- Construcción d'aparcamientos de superficie disuasorios de continuar en coche priváu nes entraes de la ciudá.

IV.1.7. EL TRANVÍA. La necesaria conexón Norte-Sur de la ciudá.

Ye necesariu un tresporte áxil y ecolóxicu pa los nuevos barrios n'expansión. El metrotrén, un gastu nunca pidíu, va ser en cualesquier casu una realidá Este-Oeste. Existe un déficit evidente dende'l centru de la ciudá hacia'l Norte que, dende Izquierda Unida-Bloque por Asturias-Verdes d'Asturies proponemos seya suplida con un tranvía de superficie complementariu col tresporte públicu municipal esistente.

Esta propuesta, histórica yá nos nuestos programes, cumple dellos obxetivos: ye ecolóxicu, ye un atractivu turísticu, ye relativamente baratu y permite a la ciudadanía xixonesa tar conectada col centru de la ciudá de forma cómoda dende la zona d'expansión de Xixón.

IV.1.8. La bicicleta como mediu de tresporte

Consideramos que llegó'l momentu pa que dende l'Ayuntamientu de Xixón s'afrente de forma rigurosa un Plan de Movilidad que tenga a la bicicleta como protagonista activa na vida municipal. L'usu de la bicicleta nun sólo hai que lu asociar al ociu, al paséu del Domingu, sinón que tamién tien de ser asumíu como tresporte alternativu, como vehículu pa desplazase al trabayu, adaptáu y adaptable a les ciudaes modernes nacionales y europees.

Ye evidente que pa favorecer y potenciar esti mediu de locomoción saludable, llimpio y baratu, necesítense más que bones intenciones. Necesítase de manera fundamental intención y voluntá política.



De non ser asina nun tien sentíu que dende l'Ayuntamientu se dean facilidaes pa fomentar l'usu de la bicicleta creando aparcamientos pa les mesmes en dellos puntos de la ciudá si, al tiempu, nun se corrixen les faltes pa l'adaptación d'infraestructures y nun se creen redes de **carriles bici que permeabilicen tola ciudá pa que la práctica de la bicicleta resulte efectiva, asequible y segura pa la ciudadanía.**

Izquierda Xunida-Bloque por Asturias-Los Verdes comprometémosmos nesta llexislatura a poner en marcha una rede de viales pa bicicletes en tola ciudá, pasando peles principales aveníes ((Pablo Iglesias, Avenida del Llano, Gaspar García Laviana, Pérez de Ayala etc...) y conectándoos coles yá esistentes (Avenida de la Constitución, Avd. Schulz etc...), lligando tou esto a **un Plan Global de Movilidad.**

Pa lo enantes dicho, IX-BA-Verdes, **comprometémosmos a abrir, al entamu del próximu mandáu, un alderique cola Federación d'Asociaciones de Vecinos de la Zona Urbana y con colectivos implicaos y/o interesaos, pa desenvolver un nuevu Plan Integral de Movilidad tresversal a les distintes aries municipales implicaes, y que reordene tol sector na ciudá, estableciendo los criterios qu'han rexir les nueves espansiones urbanes que desendolquen nel futuru.**

IV.2 MÁS VIVIENDA

La Constitución Española, en so artículu 19, consagra'l derechu de los españoles a elixir llibremente la so residencia y a circular pel territoriu nacional. Y l'artículu 47 reconoz-yos el derechu a disfrutar d'una vivienda digna y afayadiza, obligando a los poderes públicos a promover les condiciones afayadices y a establecer les normes pertinentes pa facer efectivu esi derechu, regulando la utilización del suelu d'alcuertu col interés xeneral pa impedir la especulación.

Un de los cometíos básicos de los poderes públicos ye promover les condiciones afayadices y establecer les normes pertinentes pa facer efectivu'l "derechu a disfrutar d'una vivienda digna y afayadiza" Art. 47 Constitución Española. La problemática de la vivienda afeuta en mayor midía a la mocedá, dada la situación de temporalidá y precariedá, cuando non de desemplegu. Una de les consecuencias más direutes ye'l retrasu na edá d'emancipación y la baxa natalidá. Existe una creciente dificultá de la mocedá xixonesa, xunta con otros colectivos, como families monoparentales, inmigrantes, etc., p'acceder a una vivienda n'alquiler o propiedá.

Pa tratar de correxir esta situación el Grupu Municipal d'Izquierda Xunida-Bloque por Asturias nel Conceyu de Xixón impulsó una política municipal tendente a facilitar l'accesu a la vivienda, conxuntamente colos responsables d'Izquierda Xunida nel Principáu d'Asturies, responsables de Vivienda y Bientestar Social nel Principáu d'Asturies, algamando cola so xestión, cumplir l'oxetivu que se propusieren de promover 15.000 viviendes con dalgún tipu de protección oficial. Llegando a alcuerdos que garanticen la promoción d'hasta 18.882 pisos.



Nestos últimos 4 años dende'l Conceyu de Xixón multiplicáronse les ayudes que se concedíen pal accesu a la vivienda, y a les viviendes sociales adxudicaes entamáronse programes en collaboración con otres Entidaes mesmo autonómiques como Estatales, conducentes a favorecer l'alquiler, y se trabayó con Cooperatives Sociales pa volver a entamar la promoción de viviendes baxo esti réxime, que desapaeciera de la ciudá.

Fueron per otra parte unos años en que la lentitú nel procesu de tramitación del Plan d'Ordenación Urbana, como la oposición qu'esti produjo, por un sector de la población, impidieron que se vean los frutos que se pretendíen, consistentes fundamentalmente na puesta nel mercáu d'un gran númeru de viviendes de protección oficial, que permitiría un meyor accesu a la vivienda, y que diba valir tamién de factor de correutor que llendaría'l preciu del restu de viviendes nel mercáu.

Cola esperiencia acumulada nestos años de trabayu, si contamos col vuesu sofitu, Izquierda Xunida-Bloque por Asturies-Los Verdes queremos continuar potenciando la política de vivienda nel nuesu conceyu, y pa ello comprometémosmos a poner en marcha les siguientes actuaciones:

IV.2.1 Un gran pactu de progresu pel suelu y pola vivienda pública y social

Pa garantizar el derechu constitucional a una vivienda digna, Izquierda Xunida-Bloque por Asturies-Los Verdes considera imprescindible un Pactu d'ente la Comunidad Autónoma y l'Ayuntamientu, sobre'l suelu y la vivienda, que se fundamente nel gastu públicu como motor d'una política de vivienda al serviciu de la sociedad y non de los intereses especulativos.

Propondremos una serie de midíes p'algamar la modificación la tendencia actual del preciu de la vivienda mui perenriba del incrementu sufríu poles rentes.

1. Un Pacto de progresu pola vivienda pública

Nun va ser posible iguar el problema de la vivienda ensin algamar un ampliu alcuertu ente les Alministraciones Públiques implicaes nesta materia: Ayuntamientos, y Comunidaes Autónomes. Esti Pactu va incluyir l'aumentu del gastu públicu en vivienda; l'incrementu sustancial del númeru de Viviendes de Protección Oficial y de Viviendes Sociales; y l'apueste pola vivienda d'alquiler y pola rehabilitación de vienda usada.

2. Empresa Municipal de la Vivienda de Xixón, S.L.

Izquierda Xunida-Bloque por Asturies-Los Verdes comprométese a impulsar el so funcionamientu, en cooperación cola Comunidad Autónoma, y empobinándola fundamentalmente a:

- Xestión de programa d'ayudes d'accesu a la vivienda.
- Movilización de vivienda vacía y el so destín al alquiler protexíu.



- Xestión del padremuñu públicu de viviendes n'alquiler social y protexíu.
- Coordinación con otres Instituciones Públiques pa facilitar l'accesu a la vivienda.
- Promoción de Vivienda de Protección Oficial y Vivienda Social.
- Xestión d'un Rexistru unificáu de solicitantes de vivienda, tendentes a eliminar fraudes nes adquisiciones de viviendes de protección oficial.
- Serviciu de ventaniella única de vivienda. Serviciu d'información especializáu y asesoramientu en vivienda

3. Cesión de suelu pa Vivienda de protección oficial.

Izquierda Xunida-Bloque por Asturias-Los Verdes va promocionar dende l'Ayuntamientu de Xixón el que se ponga suelu a disposición de dellos axentes pa la construcción de viviendes en réxime de protección, comprometiéndose a como mínimu les siguientes:

- **Cesión de suelu al Principáu d'Asturies, pa la construcción de vivienda de promoción pública, en réxime d'alquiler, como mínimu va cedese suelu pa la promoción de 500 viviendes.**
- **Venta de suelu, a precios llendaos, a Cooperatives pa la construcción de viviendes de protección Oficial.**
- **Cesión de suelu a la Empresa Municipal de la Vivienda pa la construcción de viviendes baxo réxime de protección oficial.**
- **Puxar actuaciones pa la construcción, por Axentes Privaos, de más de 5.000 viviendes en Xixón, suxetes a un réxime de protección oficial.**

4. Una apuesta decidida pol alquiler social y protexíu

Izquierda Xunida-Bloque por Asturias-Los Verdes **comprométese a algamar llegar a que'l 50% de les nueves viviendes que s'alquilen nel conceyu reciban prestaciones municipales**, o tengan un alquiler con preciu interveníu pola Alministración, teniendo preferencia los colectivos más desfavorecíos: como la mocedá que quiera emancipase, families monoparentales, víctimes de violencia de xéneru, discapacitaos, families numberoses o en riesgu d'esclusión social.

5. Nueves fontes de financiación.

Izquierda Xunida-Bloque por Asturias-Los Verdes considera que nestos momentos danse les condiciones técniques afayadices pa que dende les Alministraciones Públiques se llideren alcuerdos con entidaes privaes, pa incentivar la participación d'éstes n'operaciones de compra de suelu, promoción y alquiler de Vivienda de Protección Oficial y Vivienda Social. Pa ello van impulsaes alcuerdos con Entidaes Financieres de calter social.



6. Vivienda vacía

Dende'l puntu de vista social ye un escándalu que cientos de miles de viviendes permanezan vacies cuando millones de ciudadanos nun pueden acceder a una vivienda digna. Per otra parte, dende'l puntu de vista mediuambiental ye un despilfarru construyir un nuevu parque inmobiliariu cuando se pue utilizar meyor el yá esistente.

Poru, Izquierda Xunida-Bloque por Asturias-Los Verdes dende la Empresa Municipal de la Vivienda va impulsar la so puesta nel mercáu. A los propietarios se-yos va garantizar el cobru de les rentes y la conservación de los sos inmuebles, y les va realquilar a ciudadanos con necesidá de vivienda a precios sociales. Les rentes de los ciudadanos con ingresos más baxos van ser subvencionables. Complementariamente, vamos proponer **gravar fiscalmente de forma severa les viviendes desocupaes del tou puntu ocioses pa favorecer la so puesta nel mercáu d'alquiler.**

7. Ayudes a la rehabilitación y a la compra de vivienda llibre y usada

Va apoyáse a través de subvenciones les actuaciones de rehabilitación individual (viviendes privaes individuales) y colectiva (comunidaes de propietarios) de los edificios yá construyíos. Tamién se van conceder subvenciones pa l'adquisición de Vivienda Llibre Usada dientro de dellos parámetros (preciu, ingresos económicos del demandante y llimitación del dominiu y de la capacidá de disponer en función de les ayudas públiques recibies).

8. Cooperatives de Vivienda de Protección Oficial

Izquierda Xunida-Bloque por Asturias-Los Verdes manifiesten el so compromisu públicu de defensa del movimientu cooperativu nel ámbitu de la producción de Viviendes de Protección Oficial y Viviendes Sociales, aunque entendemos que dende les Alministraciones Públiques solo se tien d'apoyar a les cooperatives de vivienda con verdadera base social, separando éstes de les cooperatives ficticies montaes de forma fraudulenta por promotores privaes en torno a los concursos públicos.

9. Protección preferente de determinaos colectivos

Na construcción de viviendes de protección pública van reservase viviendes pa mayores, adecuaes a les sos necesidaes. Izquierda Xunida-Bloque por Asturias-Los Verdes va aplicar polítiques públiques de tratamientu residencial tutelar de colectivos con especiales problemes d'accesu a la vivienda; ente otros l'emergente de la nueva población inmigrante.



El mediu ambiente y la vivienda

Izquierda Xunida-Bloque por Asturias-Los Verdes considera que la vertiente medioambiental tien de dir indisolublemente xunida a una política tresformadora y alternativa de vivienda. Poro, vamos impulsar dende la Casa Conceyu les siguientes midíes:

- Subvenciones que fomenten nel sector promotor, constructivu y inmobiliariu (mesmo públicu como priváu) tipoloxíes urbanístiques y residenciales qu'integren el pensamientu y la praxis ecoloxista.
- Nes llicitaciones la **integración del mediuambiente nos proyectos constructivos va ser la condición indispensable pa poder concursar y algamar adxudicaciones d'obra.**
- **Aiciones de promoción de la eficiencia enerxética y tecnoloxía bioclimática na construcción pública y privada.**

En resume trátase d'impulsar l'accesu a la vivienda, convirtiendo la política de vivienda nuna prioridá del mandáu municipal p'avanzar hacia una ciudá con mayor binestar y más solidaria. Promocionar de forma especial la medría de la ufierta d'alquiler, impulsando la puesta nel mercáu d'un mayor númberu de viviendes d'alquiler, que pueda contribuir a reequilibrar el mercáu.

Como conclusión, queremos reiterar la nuesa apuesta por potenciar el calter residencial de la vivienda frente al so valor de cambiu como inversión, a lo menos col sofitu de fondos públicos, y por integrar la política de vivienda social nes estratexes globales de solución a la esclusión social.

Colectivos como los mayores, los paraos de llarga duración, los inmigrantes en dellos momentos de la so estancia, munches de les families monoparentales ya importantes grupos de dalgunos barrios mui "tocaos" socialmente, nun van solucionar el so problema solo con polítiques esclusives de meyora del accesu a la vivienda.

Creemos na multiculturalidá, nel usu interxeneracional de los edificios y en definitiva nos que vieno llamando l'"amiestu" social, como elementu fundamental na integración.

Apostamos por una política de vivienda basada nes persones, yá que sólo'l conocimientu fondu de les sos necesidaes, ilusiones, miedos y celos y la utilización de procesos mui participativos van danos garantías d'ésitu.

IV.3. UN XIXÓN SOSTENIBLE

Ambiente ye tolo que mos arrodiya, flora, fauna, atmósfera, agua y tamién lo artificial causáu pola actuación del home, ye'l mediu sobre'l que vivimos los humanos y demás seres vivos que mos acompañen sobre'l planeta, el que mos proporciona los elementos básicos pa la vida y el desendolcu de la sociedá humana.

Cola llegada de la era industrial y el mou de producción capitalista la incidencia negativa sobre'l mediuambiente entama a ser significativa, la cada vegada más acelerada demanda de recursos naturales y materies primes faen que los efectos negativos acentúense per tola superficie terrestre. Dende hai unes décades l'estropiciu medioambiental entama a ser alarmante.



Nel momentu actual ente la multítu de males causaos al mediuambiente, de forestación xeneralizada, desertización d'amplies zones del planeta, contaminación y escasez de los recursos hídricos, contaminación alarmante de los mares interiores y escosamientu de los recursos pesqueros, estinción de tou tipu d'especies animales y vexetales, a too esto hai qu'amestar lo que nun entamu yeren indicios y nel momentu actual yá son certeces innegables, como son la medra de les radiciones solares por mor de la disminución de la capa d'ozonu y el yá medible calentamientu global, que fai que los científicos nos dean unes previsiones futures esmolecedores pos de nun adoptar midíes urxentes la civilización sobre la tierra tal como la conocemos sufriría retrocesos qu'afeutaríen a gran parte de la humanidá.

Yá nun se pue dexar el mediuambiente en manos del nomáu mercáu, nun sistema capitalista globalizáu qu'utiliza'l mediuambiente como un recursu más pero que tresllada los costes del so estropiciu a tola sociedá independientemente de la responsabilidá nesti estropiciu.

La conservación del mediuambiente dientro d'unos modelos de desendolcu humanu sostenible ye dalgo que concierne a tolos estamentos de la sociedá hasta llegar al planu de la responsabilidá individual de cada ciudadanu.

Dende los conceyos como parte de l'alministración pública más cercana al ciudadanu han ser teníes en cuenta les cuestiones mediuambientales pa protexer el mediu ambiente, concienciar al ciudadanu d'una rellación respetuosa col mesmu y tratar de promocionar ya implantar polítiques que fagan que la utilización de los recursos se faga de forma sostenible, única garantía d'un futuru posible.

Izquierda Xunida-Bloque por Asturias-Los Verdes, propón una riestra de midíes ya iniciatives a tomar dende l'Ayuntamientu de Xixón empobinaes a algamar qu'el desendolcu de la ciudá y los sos habitantes seya cada vegada más respetuosos col mediu ambiente, adoptando modelos sostenibles.

IV.3.1 El Conceyu de Xixón, promotor d'una política ecoloxista de verdá

El Conceyu de Xixón, dientro del so ámbitu de responsabilidá, el promotor y xestor de polítiques mediuambientales empobinaes a la protección y recuperación del mediu ambiente, aforru y utilización sostenible de los recursos, implantación d'iniciatives empobinaes a la sustitución de les enerxíes tradicionales poles enerxíes renovables, reutilización de recursos como forma d'un consumu razonable, concienciación de los sos ciudadanos nun comportamientu respetuosos col mediu ambiente. Garantizando como Ayuntamientu que tolos organismos y empreses que d'él dependen adopten unos estándares mediuambientales adecuados cola filosofía que defendemos. Adoptando y poniendo en marcha como preséu de trabayu l'Axenda 21 y el Manifiestu de Llangostera de febreru de 2003.

Pa lo que proponemos dende Izquierda Xunida-Bloque por Asturias-Los Verdes les iniciatives que vienen darréu:

- **Elaboración d'una Ordenanza Municipal de Protección del Mediu Ambiente.**
- **Creación de la Comisión Municipal de Mediu Ambiente como ente independiente.**
- **Reestructuración y potenciación del Serviciu Municipal de Control Mediuambiental.**
- **Creación de la Unidá Verde dientro de la Policía Municipal.**



- **Potenciación dientro'l del serviciu de protección civil del voluntariáu verde.**
- Ellaborarásela Ordenanza Municipal sobre tenencia, usu y manexu d'animales domésticos y mascotas.
- **Utilizarásel bancu de tierra p'algamar terrenos empobinaos a l'ampliación de les zones verdes.**
- **Establecerás un programa a llargu plazu p'algamar aforru nos consumos del allumáu públicu y reducir la contaminación llumínica.**
- Entamarás una **campaña empobinada a la sustitución de les llámpares d'incandescencia por llámpares de baxo consumu na casa conceyu, organismos y empreses dependientes del mesmu.**
- Realizaránse estudios empobinaos a algamar la disuasión na tenencia de vehículos d'usu priváu con potencia desproporcionada.
- Potenciarásel Conseyu Municipal de Mediu Ambiente, algamando la pluralidá y la participación, dotándolu d'autonomía y capacidá de propuesta.

IV.3.2. Ampliación y meyora de la ordenanza municipal sobre instalaciones electromagnétiques.

Izquierda Xunida-Bloque por Asturias-Los Verdes va promover la zonificación del territoriu municipal d'alcuerdu col PGOU de forma tala que se garantice la esclusión o baxa intensidá radioléctrica na proximidá de centros educativos, centros sanitarios, asilos y polideportivos. Al mesmu tiempu se va promover::

- **Inspeición y control de los parámetros de radiación n'instalaciones radioeléctriques p'algamar l'adaptación permanente d'aquelles tecnoloxíes que permitan la mínima radiación electromagnética..**
- **Adopción na ordenanza municipal sobre instalaciones radioeléctriques de les recomendaciones d'organismos públicos y privaos, nacionales y internacionales empobinaes a garantizar la normativa más favorable col oxetu d'algamar la máxima protección de les radiaciones electromagnétiques.**
- **Implantación d'una rede de vixilancia y control de los niveles d'esposición al espectru electromagnéticu y radiaciones ionizantes que complementen y enanchen a zones fuera de control de la rede autonómica esistente.**
- **Desmantelamientu inmediatu de toa instalación radioeléctrica ilegal (nel casu concretu de les radios asociatives van tar suxetes a un nivel de tratamientu específicu).**

IV.3.3. Protección del Mediu Ambiente

Izquierda Xunida-Bloque por Asturias-Los Verdes va promover les siguientes actuaciones nesta materia:

- **Crearánse zones de masa forestal con especies autóctones.**
- Potenciaránse y se catalogarán zones de reserva biolóxica d'especial interés.



- Crearásen pantalles vexetales que corrixan situaciones agresives col mediuambiente.
- **Recuperarásen zones y terrenos mediuambientales degradaos.**
- **Potenciarásen zones verdes y corredores que les interconecten.**
- Intervendrásen nos polígonos industriales pa mitigar les situaciones d'agresión al mediu ambiente tratando d'integrar midíes medioambientales (arbolaos d'aveníes, pantalles vexetales, etc.).
- Tratarásen d'implantar de forma paulatina la separación d'agües pluviales de les agües fecales y industriales que permita'l pretratamientu d'estes últimes.
- Intensificarásen'l control de tou tipu de residuos tóxicos nes ries de la zona rural.
- **Control y reducción sele de ruidos, emisiones y vertíos contaminantes.**
- **Creación del catálogu de puntos negros mediuambientales y actividaes nocives y peligroses.**
- **Promocionarásen campañes empobines a algamar el compromisu del sector priváu en cuestiones mediuambientales** incentivando los convenios de colaboración.

IV.3.4. Axencia Local de la Enerxía

Izquierda Xunida-Bloque por Asturias-Los Verdes comprométense desenvolver les siguientes actuaciones por parte de la citada Axencia municipal:

- Realizará'l mapa enerxéticu del conceyu.
- Plan de renovación enerxéticu pa la implantación d'enerxíes renovables.
- Programa de sofitu a la mediana y pequeña empresa de Xixón pal aforru y racionalización enerxética.
- Programa d'emplegu universitariu y plan d'emplegu pa titulaos recientes de formación profesional pal sofitu a la mediana y pequeña empresa en temes mediuambientales.



IV.3.5. Fundación Municipal de Cultura

Izquierda Xunida-Bloque por Asturias-Los Verdes entiende que na próxima llexislatura tien de formar parte de los obxetivos de la FMC l'algamar que la protección y la conservación del mediuambiente forme parte preferente del acerbu cultural de Xixón.

- **Concursos y certámenes lliterarios sobre'l mediuambiente.**
- Concursos audiovisuales sobre mediuambiente.
- Conferencies y esposiciones sobre mediuambiente.
- Obres teatrales y cinematográfiques sobre temes medioambientales.
- **Campañes de concienciación y formación en temes medioambientales.**
- Cursos sobre temes medioambientales na Universidá Popular.

IV.3.6. Fundación Municipal de Servicios Sociales

Incorporará los temes de mediu ambiente como preseos p'algamar la educación, formación y integración social.

- Ellaboración de programes empobinaos a la promoción d'empreses de recuperación, restauración y reciclaxe, enfocaes a colectivos d'inserción y especial protección.
- Ellaboración d'estudios sobre l'algame de recursos y subvenciones d'otres alministraciones y organismos pa la creación y funcionamientu d'empreses d'interés mediuambiental en colectivos sensibles.
- Programa d'apoyu a la distribución de productos ecolóxicos mediante autoxestión de colectivos d'especial protección.
- Promoción y coordinación como mediu d'apoyu a la reinserción del voluntariáu verde.

IV.3.7. Patronatu Deportivo Municipal.

Dende Izquierda Xunida-Bloque por Asturias-Los Verdes entendemos que'l PDM va tener como oxetivu l'algamar un comportamientu respetuosu col mediuambiente na práctica del deporte adaptando les instalaciones propies a tales fines mediante l'aforru enerxéticu y la integración n'espacios naturales.

- Van primáse aquellos deportes respetuosos col mediuambiente.
- Van realizase campañes empobinaes a reducir l'impactu ambiental de les disciplines más agresives col mediuambiente.
- Va promocionar deportes llimpios (vela o remu).
- Va promocionase l'usu de la bicicleta en Xixón.
- Va realizase la instalación de sistemes alternativos de producción d'enerxía instalaciones, paneles solares, paneles fotovoltaicos, bombes de calor, etc.



- Va implantar midíes d'aforru enerxéticu mediante la racionalización de consumos, adecuaoos aislamientos térmicos y recuperación del calor.
- Van tener cabida dientro del so programa de subvenciones aquelles actuaciones d'entidaes deportives empobinaes al aforru enerxéticu y actuaciones de protecciones mediuambientales.

IV.3.8. El Xardín Botánicu Atlánticu de Xixón.

Izquierda Xunida-Bloque por Asturias-Los Verdes va defender l'ampliación de la xestión del centru p'algamar una potencialización del mesmu adquiriendo nueves capacidaes que lu conviertan en Xardín Botánicu y Centru d'Estudios sobre Biodiversidá.

- Planes de reforestamientu del conceyu.
- Planes d'estudiu pa la recuperación de suelos.
- Estudios sobre idoneidá d'especies vexetales.
- Estudiu sobre biodiversidá animal y vexetal nel conceyu de Xixón.
- Estudios sobre especies invasores y planes d'eliminación.
- Elaboración de convenios d'investigación y collaboración con otros centros asemeyaos, Universidá, Conseyería d'Agricultura y organismos dependientes, Conseyería d'Educación y otres entidaes públiques y privaes.
- Llocalización y catalogación d'especímenes vexetales d'altu interés dientro del conceyu.
- Llocalización, estudiu y catalogación de zones d'altu interés biolóxicu de zones d'altu interés biolóxicu dientro del conceyu con especial atención a los humedales.

IV.3.9. La Empresa Municipal d' Agües

Dende Izquierda Xunida-Bloque por Asturias-Los Verdes defendemos l'establecimientu de les polítiques necesaries pa la xestión integral y racional del agua optimizando los métodos d'emplegu d'esti recursu col oxetu d'algamar altes tases d'aforru d'agua.

- **Política tarifaria que penalice los grandes consumos con incentivación a la implantación de midíes d'aforru.**
- **Polítiques d'aforru en riegos, procesos industriales y instalaciones deportives.**
- **Reutilización del agua tratao depués de la depuración pa procesos industriales, riegos y otres actividaes que lo permitan.**
- Separación en zones de nueva urbanización del agua fluvial.
- **Penalización proporcional a los grandes vertíos d'agua según el so nivel de contaminación.**
- **Planificación pa la implantación de la depuración terciaria.**
- **Planificación de modelos de xestión del alcantarelláu cola incorporación de la nueva depuradora Este que prevean riesgos con posibilidá de provocar vertíos contaminaos a accidentales.**



IV.3.10 Empresa Municipal de Tresportes Urbanos

Va establecer programes d'estudios de fluxos de pasaxeros adecuando los medios col oxetu d'algamar una óptima ufierta del serviciu y aforru enerxéticu.

- **Potenciación y meyora del sistema de control en tiempu real.**
- **Plan de combustibles alternativos.**
- **Vehículos de propulsión mista.**
- **Estudios sobre viabilidá de nuevos tipos de vehículos.**
- **Esclusividá del tresporte públicu en zones especiales y d'altu nivel ecolóxicu.**

IV.3.11. Empresa Municipal de Llimpieza y Servicios Medioambientales

Dende Izquierda Xunida-Bloque por Asturias-Los Verdes comprometémosmos a llevar alantre les siguientes actuaciones dende EMULSA:

- Adecuación de la flota y medios materiales empobinaos a algamar l'aforru enerxéticu y emisiones contaminantes.
- **Plan de combustibles alternativos.**
- **Implantación de la recoyida selectiva de materia orgánica.**
- **Implantación de la recoyida selectiva d'aceites domésticos.**
- **Ampliación y meyora de los puntos de recoyida selectiva y puntos llimpios.**
- **Planes y convenios específicos pa Industria, comerciu y hostelería pa la recoyida de residuos.**
- **Utilización de materiales reciclaos, especialmente, compós en llabores de xardinería.**
- **Campañes específiques a sectores y colectivos sobre la xestión de residuos urbanos, selección y reciclaxe.**
- **Campañes xenerales de concienciación na utilización del serviciu de recoyida de basoria y los sos horarios.**
- **Estudiu sobre nueves posibilidaes y opciones na recoyida selectiva de residuos.** Afirmamos que la incineración indiscriminada de basures ye cara, anticolóxica y peligrosa pa la salú. La so utilización como métodu central de tratamientu de los residuos impide'l desarrollu de les polítiques sostenibles de reciclaxe, recoyida selectiva, reutilización y reducción de residuos.



- Estudios sobre puntos prietos y deficiencias del serviciu de la recoyida de residuos sólidos urbanos.

IV.3.12 Empresa Municipal de Vivienda (EMVISA)

Va promover campañes empobinaes a la divulgación y concienciación nel aforru enerxéticu y construcción sostenible.

- Racionalización y aforru enerxéticu na vivienda.
- Promoción de la sustitución de llámpares incandescentes por llámpares de baxo consumu na utilización doméstica.
- Paneles solares p'agua caliente y calefacción en viviendes nueves y reformes.
- Promoción de los paneles fotovoltaicos na vivienda unifamiliar y grandes instalaciones.
- Promoción de la bomba de calor en combinación cola reversalidá de sistema d'aire acondicionáu.
- Promoción de sistemes de recuperación de calor.
- Coxeneración individual.
- Aislamientu térmico y acústico.
- Promoción de sistemes electrónicos automáticos de regulación n'instalaciones centralizaes de calefacción y ACS.
- Bioconstrucción nel ámbitu rural.

IV.3.13 Protección y defensa de los animales.

Pa los próximos 4 años de llexislatura municipal, los homes y mueres d'Izquierda Xunida-Bloque por Asturias-Los Verdes comprometémosmos a poner en marcha les siguientes actuaciones:

- **Oposición de los espectáculos con tratu cruel a los animales. Non a la retransmisión por televisiones públiques d'estes actividaes.**
- **Campaña de concienciación en materia de protección animal nos medios.**
- **Creación d'un Organismu, Oficina o Departamentu de Defensa de los Derechos de los Animales.**
- **Dotación de tolos medios afayadizos a los centros d'acoyida y recuperación d'animales. Albergues de perros y gatos n'óptimes condiciones, con campañes constantes contra l'abandonu y a favor de l'adopción, asina como de la esterilización quirúrxica de perros y gatos. Aplicación de la eutanasia nos albergues sólo nos casos d'enfermedá incurable del animal, y siempre aplicada por veterinarios/es.**



- Promover la participación d'organizaciones de defensa y protección de los animales nel funcionamientu de les perrerres municipales y nel so control.
- Delimitación de camines o aries de paséu con perros (ataos o non).
- Prohibir progresivamente la esperimentación con animales ya incrementar el control y les inspecciones.
- Control de les colonies de gatos esterilizándolos, vacunando y desparasitando.
- Control de les palombes con sustancias inocues pa les aves, que faen que los güevos seyan infértiles, como l'*Ornityl*.
- Promover la esterilización obligatoiria de les mascotas pa evitar la sobrepoblación d'animales en busca de llar.
- Identificación obligatoria de toles "mascotes".
- Sofitu espresu al Proyeutu Gran Simiu.

V. UN MODELU SOCIAL ALTERNATIVO, MÁS SERVICIU PÚBLICO MÁS POLÍTiques SOCIALES

La nuesa, la d'Izquierda Xunida-Bloque por Asturies-Los Verdes, ye una apuesta por una Alministración Local, por un Ayuntamientu que nun se conforme con xestionar en provechu de toes y toos la riqueza común, que nun se conforme nin siquiera con xestionala bien. Amás de recrear y medrar esa riqueza como diximos nos capítulos d'enantes, hai que la repartir, distribuyir equitativamente, si acasu dando más a los que menos tienen, que nun quier dicir que seyan los que menos aportaron. Y esi repartu o distribución de la riqueza fadrémoslu proporcionando salú, educación, cultura, servicios, bienestar social, calidá integral de vida... D'ello falamos nos capítulos siguientes.

V.1. UN XIXÓN SALUDABLE

Pa Izquierda Xunida-Bloque por Asturies-Los Verdes, salú ye'l conxuntu de condiciones físicas, sociales y mediuambientales que, xunta a unos afayadizos recursos humanos, permiten vivir a cada home y cada muyer nun equilibriu internu, colos demás y col mediu, que mos facilita'l máximu disfrute de la vida personal y nos capacita p'aportar lo meyor de nosotros y nosotres a la vida social. Ente la realidá d'una salú llimitada y la utopía d'una integral y xeneralizada, tien d'haber una tensión personal y social por algamar les mayores cuotes de salú personal y pública posibles. A esto han contribuyir les polítiques de salú, a esto quier contribuyir la nuesa política conscientes de ser la promoción de la salú'l primer oxetivu nel deber municipal de repartir riqueza.

Ye evidente qu'en materia de salú tal y como la concebimos, hai competencias propies y/o compartíes ente toles Alministraciones: estatal, autonómica y local. Manteniendo'l criteriu de máxima collaboración coles otres Alministraciones y, particularmente, cola d'Asturies una vegada que tean tresferíes les competencias de sanidá, al nuesu Ayuntamientu correspón-di-y un importantísimu papel respeutu al que queremos destacar los principios qu'han rexir la so actuación.



gana xixón

Pero nun debemos escaecer la importancia de la participación ciudadana, como s'amosó nel casu del Serviciu de Radioterapia pa Xixón algamáu durante l'actual llexislatura.

V.1.1. Criterios políticos

- Creación d'una Conceyalía de Salú Medioambiental y de Calidá de Vida, esta conceyalía va permitir desenvolver competencies de calter local y meyorar la coordinación de diferentes actuaciones venceyaes col mediuambiente y la salú, asina como mantener nesta direición niveles de rellación intensa colos ámbitos autonómicos

- **Promoción de la Salú**

Situaciones como les distintes condiciones de trabayu, el paru, les relaciones personales, l'alimentación..., ye dicir la nuesa forma de vida xunta cola calidá mediuambiental y la organización económica y social, son factores qu'influyen más na nuesa salú dende una perspectiva preventiva de los servicios asistenciales paliativos.

- Promocionar la salú ye promover, con idegues y aiciones, la meyora de los factores qu'influyen nella.
- Defensa de lo públicu en materia de sanidá y salú, ye dicir, de les infraestructures sanitaries como elementos fundamentales pa garantizar la gratuidá, equidá, solidariedá, eficacia y eficiencia nes prestaciones.
- Defensa de la rede sanitaria pública, organizada nun marcu de derechos y deberes y non baxo una concepción de mercáu. La rede concertada n'Asturies, como son los hospitales de Xove y Cruz Bermeya en Xixón, debemos esixir que s'integre progresivamente na rede pública.
 - Ampliación del Hospital de Cabueñes.
- Defensa de la gratuidá y universalidá del serviciu públicu de salú, de toes y caúna de les prestaciones. L'atención a la población emigrante o marxinao habrá ser complementada con un siguimientu dende la Fundación Municipal de Servicios Sociales.
- Desarrollu de la participación ciudadana na rede sanitaria pública: Conseyos de Salú de Distritu y d'Aria, participación abierta a asociaciones de vecinos, sectorial (muyeres, mayores...), sindicatos, pacientes...
- Desendolcu y execución de les competencies municipales en materia d'hixene, consumu, salú medioambiental, alcantarelláu, viviendes y espacios públicos, etc.: control de calidá de les agües, vixilancia de toa clase de vertíos, control de la contaminación atmosférica, acústica, llumínica...; de la hixene de los sitios públicos, mataderos, repartu d'alimentos...; de la salubridá y habitalidá de viviendes, centros públicos; control de vertederos, campañas de desratización...; campañas d'educación pa la salú, consumu de drogues ...



V.1.2. Infraestructures sanitaries

- Completar la rede d'atención primaria, equipando y modernizando la esistente, con unidaes de servicios mínimos en parroquies rurales y unidaes móviles de serviciu a domiciliu.
- Dientro d'una xusta ordenación de territorios, necesidaes y recursos con criterios d'universalidá, calidá, eficacia y eficiencia, dotar a los hospitales del aria, en concretu del aria V, de recursos abondo pa reducir les llistes d'espera, eliminar comes supletories en situaciones de normalidá, prestar los servicios especializaos que s'axusten a les cifres y necesidaes poblacionales desdoblándolos cuando asina lo esixa responder en tiempu, calidá y forma a la demanda ciudadana.
- Problemes de salú personal y social como l'anorexia, abulimia, VIH-SIDA, enfermedaes de tresmisión sexual, ente otres, hanse implementar con polítiques de prevención, asistencia estrasanitaria y solidariedá vinculaes a la Fundación Municipal de Servicios Sociales.
- En collaboración coles instancies central y d'Asturies, desenvolver polítiques y bones práctiques d'educación pa la salú, prevención d'enfermedaes, contaxos, riesgos llaborales, etc.

V.2. UN XIXÓN COHESIONÁU: LOS SERVICIOS SOCIALES

El mundu del trabayu, los sistemes de protección social, les redes d'asistencia, los conteníos y el mesmu procesu de formación de los trabayadores sociales y les sos funciones, asina como la natura de los colectivos y persones que reclamen la prestación de los nuegos servicios sociales, esperimenten na actualidá un cambiu d'un alcance que nun s'ha subestimar. Cuestiones planteaes por multitud d'investigadores y trabayadores sociales, como la feminización d'importes estayes del mundu del trabayu, la rellación ente la globalización de los capitales y la so correspondencia cola emerxencia d'una fuerza de trabayu global, tan móvil como los mesmos capitales (aunque menos llibres nos sos movimientos), l'impactu de les nueves tecnoloxíes y los nuevos significaos de conceptos como desemplegu, vieyez<, mocedá o ociu, ente munchos otros, son perfectamente constatables na nuesa realidá local. Esta nueva situación esixe una respuesta social solidaria, una política de solidariedá, una...



V.2.1. Política social alternativa

Izquierda Xunida-Bloque por Asturias-Los Verdes de Xixón concibe un modelu de política social en contínua interrelación col restu de les aiciones polítiques (educatives, culturales, económicques, sanitaries, de vivienda, etc), tando especialmente venceyada a la política económica. La política social municipal tien de plantegar aiciones nes que los sos obxetivos vayan empobinaos a una progresiva eliminación de cualesquier tipu de desigualdá (económica, social, llaboral, física, psíquica, de xéneru, etc.), dende'l puntu d'una política d'izquierdes basada na tresformación y el cambiu social.

La esclusión social nes sociedaes desendolcaes ye güei una realidá complexa y cambiante. La esclusión yá nun ye un aspectu carauterísticu sólo de los grupos más desfavorecíos. La precariedá llaboral, la movilidad llaboral, el fenómenu migratoriu de doble sentíu (qu'atrae a la ciudá de nueso a inmigrantes de fuera de les nueses fronteres y que, per otru llau, obliga a emigrar a una parte mui apreciable de la nuesa mocedá), l'amenaza que suponen les intenciones –non siempre espresaes abiertamente- de privatizar una parte o la totalidá de los servicios sociales, tou ello, obliga repensar el modelu d'asistencia social y la so implicación nel texíu social y productivu xixonés.

Les situaciones de riesgu afeuten a nueves franxes de población, incluso a aquelles que tradicionalmente disfrutaron d'amplios niveles d'integración y seguridá. Anguaño, la indefensión y la inseguridá favorecen la esclusión por causes tan variaes como arbitraries (familiares, de salú, de perda de puestu de trabayu, vivienda...). Como ye lóxico, ente estes circunstancies, la única opción inaceptable ye la inhibición de los poderes públicos.

Asina pos, intervención. Una aición consciente y constante qu'incorpore nel so proyectu les siguiente premises: la corresponsabilidá, subsidiariedá, coordinación y collaboración institucional, l'actuación integral, la implicación y participación de la ciudadanía na aición y la evaluación continuada, amás d'una preocupación especial venceyada cola racionalización de la financiación de los servicios.

Nesti puntu tenemos que reseñar que tres llargos años de bascular les responsabilidaes que, mesmo l'Alministración central como l'autonómica relegaben al Conceyu ensin nengún tipu de compensación económica, nos últimos 4 años la Conseyería de Vivienda y bienestar Social dirixida por IX entamó a asumir niveles de collaboración a través de convenios específicos en rellación a los mayores, a discapacitaos mesmo físicos como síquicos, lo que supunxo una descarga presupuestaria importantísima pal Conceyu de Xixón.



El desarrollu comunitariu defínese anguaño como una opción estratéxica qu'ha concentrase nestes exes de llucha contra la esclusión social:

1. La necesidá de dar respuestes globales a los problemes que xeneren la esclusión y la consiguiente coordinación de les intervenciones de les Alministraciones. Les polítiques sociales a desenvolver nun se pueden llendar a la xestión del día a día, de les situaciones de crisis. Ye necesariu desenvolver un marcu global que posibilite la estructuración y coordinación de les polítiques específiques pa cada nivel d'intervención, a mediu y llargu plazu.
2. El barriu y/o distritu han ser los territorios preferentes, pola so configuración, dimensión, estructura y sobre too poles rellaciones de proximidá cola ciudadanía, p'afrontar la llucha contra la esclusión social, situación casi siempre acompañada de la esclusión espacial. Éstos son, a fin de cuentas, los espacios onde s'enmarca la vida cotidiana de la comunidá.
3. Necesidá de realizar un diagnósticu común por parte de toles entidaes sociales, culturales y económicques de la ciudá. Un diagnósticu social y económicu indispensable pa evaluar y garantizar, previu consensu, los meyores resultaos, optimizando los recursos y evitando la duplicidá d'actuaciones.
4. Puxar la revitalización de barriu o distritu, como condición indispensable pa lluchar contra la esclusión.
5. La coordinación de lo públicu/privao en toles intervenciones.
6. Facer de la inserción pa la ocupación una de les exes básiques de llucha contra la esclusión, mediante l'impulsu y el soporte a les iniciatives d'economía social y d'economía solidaria, implicando nesti procesu a la ciudadanía, al texú asociativu y a los axentes non sólo sociales sinón tamién económicos.
7. La xestión/coxestión son instrumentos de concreción y compromisu pal desendolcu de los programes d'intervención.

Dende estes premises, Izquierda Xunida-Bloque por Asturies-Los Verdes de Xixón, propón como exes fundamentales de la nuesa política que:

- Los Servicios Sociales, como servicios públicos, han buscar formes de xestión, organización, planificación y funcionamientu eficacies, capaces d'algamar una alta rentabilidá social.
- Ello nun ye incompatibilidá col sofitu, subvención o conveniu con delles iniciatives de calter social, aunque siempre con un control públicu afayadizu.
- Creyemos na necesidá de mantener el calter universalista de los servicios sociales ensin prexuciu de desenvolver polítiques empobinaes a colectivos específicos.



- Propugnamos la necesidá de fortalecer, tamién nesti ámbitu les posibilidaes de participación ciudadana, incorporando a un Conseyu Consultivu a les distintes asociaciones, colectivos y ONG que desenvuelven la so actividá nel ámbitu de los servicios sociales.
- Pretendemos configurar planes integrales que respuendan a les necesidaes específiques de muyeres, neños, mocedá, persones con minusvalíes, drogodependientes, ancianos/es, qu'incorporen midíes d'aición positiva.

V.2.2. Les nuses propuestas

1) Sofitu al salariu social

El Salariu Social, que mos costó una dura batalla cola FSA ye yá una realidá en Xixón, que contién a más de la tercera parte de los posibles usuarios d'esti derechu suxetivu. Esti programa específicu, como otros, nun esistiría si IX-BA nun gobernara en Xixón y Asturias los últimos años.

Embaxo esti conceptu hanse agrupar les ayudes empobinaes a aquelles persones y/o unidaes de convivencia que a'alcuentren en situación de dificultá económica y qu'han tener reconocíu'l derechu a acceder de baldre a los distintos servicios municipales, mesmo deportivos como culturales, asina como los suministros d'agua y el tresporte públicu. Ayudes d'emergencia, vales d'alimentos, servicios de canguros y beques salariu son dalgunos de los subprogrames que nesti apartáu s'han desenvolver.

2) La infancia

Les nueves circunstancies sociales, culturales y económicas demanden cada vegada con más fuerza l'atención a la infancia como etapa de la vida con necesidaes específiques. Los neños y neñes son persones suxeto de derechu colos que se tien de cuntar y sobre los que se debe intervenir socialmente, mesmo pa protexelos como pa facilita-yos idéntiques oportunidaes vitales. Tienen que garantizase los derechos individuales de la infancia, mesmo no que se refier a la so potenciación como ciudadanía ye dicir la so participación social.

La ciudá, les sos infraestructures y los sos servicios han ufrir un entornu ricu y estimulante que potencien el desendolcu integral de los neños y neñes. Poro, les actuaciones qu'Izquierda Xunida-Bloque por Asturias-Los Verdes plantea han ser planificaes nun sólo dende la Fundación de Servicios Sociales sinón, dende los distintos ámbitos municipales.

Izquierda Unida-Bloque por Asturias-Los Verdes propón les siguientes actuaciones básiques:

- Elaboración d'un **Plan Integral** de la infancia nel que se contemplen actuaciones empobinaes a families, educación, ciudá, ociu, tiempu llibre y salú.



- Creación d'un Conseyu de la Infancia, que participe direutamente na ellaboración, desendolcu y evaluación del plan.
- Completar la rede de centros de día, enanchándola a tolos barrios de Xixón.

3) Emigración y inmigración

Con respetu a la emigración, foi un llogru d'esta llexislatura que la Oficina d'Emigración vuelva a tener la so sé en Xixón depués de que'l PP la treslladara a la Delegación de Gobiernu d'Uviéu en febreru de 2004. Con ella dase serviciu a muchos xixonones retornaos a la ciudá de nueso depués de pasar llargos años lloñe de la so tierra.

Per otru llau, ye imprescindible fomentar de manera práctica la plena integración de la ciudadanía xixones coles distintes comunidaes d'emigrantes que vienen a asentase na nuesa ciudá. Pa ello vamos impulsar, en primer puntu, la creación d'una *comisión conxunta* onde tean representaos los diversos colectivos d'inmigrantes y el propiu Conceyu. Nun hai sitiu pa una aición democrática ensin la participación nel diseñu de les polítiques, los planes y los periodos d'execución.

Son criterios a impulsar dende Izquierda Xunida- Bloque por Asturias-Los Verdes:

- Contribuyir a eliminar la invisibilidad social del inmigrante. Requiere pa ello'l desarrollu de les sos propies organizaciones y la conquista d'una presencia pública digna dende les sos actividaes, yá seyan estes culturales, relixoses, sociales, educatives, etc., poniendo a la so disposición los medios y recursos afayadizos pero respetando la so autonomía cultural. Un aspectu crucial na conquista del espaciu públicu ye'l reconocimientu del derechu al votu nes elecciones municipales de tolos y toles inmigrantes residentes nel conceyu.
- Independientemente de la condición del inmigrante, los servicios sociales van atender a tolos demandantes de servicios en pie d'igualdá col restu de los y les ciudadanes. Nun se requier pa ello la creación d'un organismu nuevu nel sen de la Fundación de Servicios Sociales, sinón l'aprobación d'un plan p'acometer per tola rede d'atención que tien de cumplir xeres de:
 - Atención en situaciones d'urxencia.
 - Información.
 - Tramitación y renovación de documentos.
 - Asesoramientu nel casu de privación de derechos o sufrimientu d'arbitrariadaes nos ámbitos de la vivienda, l'actividá llaboral, la educación, la vida sociales o cualesquier otu.



- Como'l restu de los ciudadanos y ciudadanes, tiene derechu a una vivienda digna siendo necesario correxir les situaciones de falta d'habitabilidad que se presenten y garantizar el derechu d'accesu a les viviendes sociales. L'Ayuntamientu tien d'impulsar de manera más activa la creación d'una rede de pisos d'acoyida, mesmo apoyando a los yá esistentes por iniciativa d'ONG como por mediu de la creación d'una infraestructura propia. Asina mesmo tien de garantizase'l derechu a acceder a ayudes pal arriendu y merca de viviendes de protección oficial, creando programes que permitan al Conceyu actuar como garante de los arriendos de viviendes de los mesmos a particulares.
- Apoyu a la educación de la infancia, mocedá y educación d'adultos/es.
- Xixón tien de se dotar d'una política activa d'atención a los y les refuxaes. Millones de persones viven actualmente desplazaes de los países d'orixe y la nuesa ciudá tien de contribuir solidariamente a enmollecer, na medida de lo posible, les sos carencies. Pa ello, Izquierda Xunida-Los Verdes-Bloque por Asturias va impulsar programes de colaboración coles ONG que trabayen nesti ámbitu cola fin d'incrementar la participación municipal.

4) Persones mayores

La realidá socioeconómica de la población xixonosa fai que prestemos especial atención hacia'l collectivu de persones prexubilaes que demanden actuaciones específiques. Izquierda Xunida-Bloque por Asturias-Los Verdes tien de diseñar una serie d'estratexes empobinaes a l'atención d'estos sectores d'una forma integral.

Éstes son les actuaciones qu'entendemos como imprescindibles:

- Fomentar esperiencias d'ayuda conxunta interxeneracional qu'incrementen la cohesión social.
- Fomentar actividaes que prevengan l'aislamientu social, tipu güerta d'ociu, educación d'adultos, participación n'asociaciones de vecinos y vecines, culturales, deportives...
- Potenciar el contactu cola natura a través del senderismu, contribuyendo a algamar una sensibilización hacia la conservación del mediu ambiente.
- Apoyu a les actividaes que se propongan realizar nos llares de pensionistes xubilaos y xubilaes.
- Esixir al SESPA la dotación del personal de xeriatria necesariu en cada centru de salú.



- Coordinación de los servicios sociales colos servicios sanitarios p'algamar una intervención integral.
- Necesidá d'un hospital xeriátricu en Xixón
- Ampliar entovía más el serviciu d'ayuda a domiciliu, teleasistencia, centros de día y apartahoteles pa evitar, no posible, la institucionalización e les persones mayores favoreciendo la so permanencia nel so entornu habitual.
- Enanchar la ufierta de places asistíes n'instituciones residenciales públiques, siguiendo con esperiencias como la Residencia Pública pa Mayores en Montevil comprometida pola Conseyería de Vivienda y Bientar Social que conxuga apartahotel-residencia y centru de día.
- Poner en funcionamientu programes socioasociativos y de prevención d'incapacidaes empobinaos a fomentar l'autonomía de les persones mayores.

5) Persones discapacitaes

Creemos que nesta cuestión nun pue existir nenguna política válida que nun pase peles siguientes midíes:

- Superar les barreres arquitectóniques existentes na ciudá mesmo nes cais como n'edificios públicos, elevando los pasos de cebra al nivel de l'acera.
- Adaptación de tolos autobuses del tresporte públicu, incrementu del númberu de taxis adaptaos y la subvención a los y les usuaries que lo precisen.
- Creación d'un centru de día como apoyu a les families.
- Subvención a la hostelería y el comerciu qu'aborden obres de supresión de les barreres arquitectóniques nos sos locales.
- Continuar coles subvenciones a la instalación d'asensores nos edificios de cuatro o más altures que nun cuenten con esi serviciu, adecuándolo económicamente.
- Definición d'un catálogu de puestos de trabayu na estructura municipal que puedan ser desempeñaos por trabayadores minusválidos y minusvalidees.
- Reserva d'un 5% de puestos de trabayu pa minusválidos y minusválides na ufierta pública d'emplegu, empreses municipales y planes municipales d'emplegu.

6) Drogodependencies

Resulta absolutamente necesariu afrontar de manera valiente tola enorme complexidá qu'impliquen les mui diferentes situaciones en que se produz el consumu y/o abusu d'estes sustancias. Izquierda Xunida-Bloque por Asturias-Los Verdes aborda esti problema teniendo en cuenta los distintos momentos que detallamos darréu:



6.1) Prevención y tratamientu

- Desenvolver programes coordinaos colos centros públicos de secundaria empobinaos a la prevención de toxicomanías a través de talleres de consumu, salú...
- Fomentar programes d'ociu alternativu.
- Programes llibres de drogues: potenciar o establecer convenios con asociaciones que respeten los criterios de gratuidá, llaiques y con una trayectoria qu'avale los sos resultaos.
- Programes de reducción del mal: pa la realización d'esti tipu de programes diba ser necesaria una atención coordinada ente los centros de salú, los centros de salú mental y la Fundación Municipal de Servicios Sociales pa garantizar una atención global al receptor del programa.

6.2) Inserción

- Promover la inserción social d'esti colectivu a través d'aiciones positives nos planes d'emplegu y nes ayudes que favorecen l'accesu a la vivienda.

6.3) Otres midíes

- Planes específicos d'ayuda a les families de drogodependientes.
- Campañes de sensibilización orientaes a desenvolver actitues solidaries hacia esti problema social.
- Incrementar y dotar con más fondos y medios les campañes d'intercambiu de xeringues empobinaes a los y les usuaries de drogues por vía parental.

7) Prostitución

- Realización d'un estudiu sobre les condiciones de vida de les persones qu'exercen la prostitución na ciudá.
- Realizar campañes de prevención d'enfermedaes de tresmisión sexual ente los y les trabayadores del sexu.
- Programes de dignificación social qu'incluyan midíes superadores de les situaciones d'esclusión social.

8) Minorías étniques

- Participación de los colectivos organizaos nes actuaciones d'apoyu pa evitar l'absentismu escolar.
- Ayudes pa la obtención del carné de conducir pa exercer la venta ambulante.



- Ampliación de la oferta de viviendes sociales, con asistencia y siguimientu dende la Empresa Municipal de la vivienda y de la Fundación Municipal de Servicios Sociales.

V.2.3. Participación

Configuración d'un Conseyu Sectorial de Participación de les organizaciones que trabayen nel campu de los Servicios Sociales, nel que se debata, proponga, programe y evalúe la intervención social realizada, sacando conclusiones y meyorando les propuestes nun procesu contínuu.

V.3. UN XIXÓN EDUCATIVU

IV.3.1. El contestu educativu xeneral

Una reivindicación básica de les organizaciones polítiques y los movimientos sociales qu'acabaron converxendo no que, entovía güei, entendemos como izquierda, foi l'absoluta necesidá de contemplar la educación como instrumentu fundamental pa garantizar la igualdá social y de derechos básica ente tolos ciudadanos. Tradicionalmente, los poderes públicos fueron consideraos como parte imprescindible p'asegurar el cumplimientu d'esta misión que, prácticamente, toles cartes magnes democrátiques reconocen.

Actualmente, como en tantes otres cuestiones, asistimos a la operación d'acosu y desgaste del derechu a una educación pública, llaica y de calidá por parte de les polítiques neoliberales impuestes dende les cúpules del Estáu y na so complicidá con intereses privaos. Si la primer etapa de gobiernu del PSOE supuso un enorme desengaño y la ofensiva brutal del PP –por mediu d'una protestada llei de Calidá de la Enseñanza- trayía un mal disimuláu intentu de minar el sistema públicu d'enseñanza, la esperanza puesta na llegada de Zapatero al poder prontu se vió ensolombrada cola aprobación d'una Llei Orgánica d'Educación que nun algamó los obxetivos que la izquierda ambicionaba.

La reducción de gastu públicu, los intentos privatizadores, la xeneralización de los conciertos educativos (llevada a cabu mesmo pol PSOE como pol PP), asina como un reforzamientu del poder y la influencia de dalgunes órdenes relixoses, amenacen seriamente esti preséu igualitariu que debería ser la educación.

¿Y Xixón? Ciertamente, disponemos d'una rede de centros públicos mui estimables no que respecta a infraestructures, calidá de serviciu educativu, oferta estraescolar, cultural, deportiva, etc. El méritu d'estos llogros correspuende, ensin dulda, a la llarga llucha de la ciudadanía xixonesa dende finales del franquismu y a la vixilancia y conciencia que mantién en rrellación a la importancia de la enseñanza pública. Tampoco queremos obviar el papel de les instituciones municipales que, durante munchu tiempu, impulsaron polítiques abondo satisfactories en defensa de la enseñanza; polítiques nes qu'IX xugó un papel fundamental, sobre too nestos últimos 4 años nos que detentamos la Conceyalía d'Educación.



gana xixón

Dende ella IX puso en marcha 7 Escuelas Infantiles Municipales de 0-3 años, dalgo imposible de comparar con otros conceyos d'Asturies, y en sólo 4 años. El nuesu oxetivu ye que tolos barrios de Xixón con necesidaes poblacionales, puedan disponer d'a lo menos d'una Escuela Infantil Municipal.

De toes formes, los problemes xenerales que señalamos más arriba perviven entovía, puesto que l'empeñu d'IX nos últimos años nun foi secundáu polos nuestos socios de gobiernu nel Principáu d'Asturies, que son los detenten la responsabilidad. La dualización de los centros escolares (y poro de la mesma sociedad escolar xixonesa) sigue reproduciendo un esquema clasista nel que la mayor parte de los centros privaos-concertaos orieéntense a les clases medies o altes y se practica la exclusión d'importantes segmentos del alumnáu por motivos culturales o académicos. Pol contrario, son los centros ubicaos nos barrios los que se deben enfrentar les complexes situaciones qu'aquexen a los colectivos más desfavorecíos de la nuesa ciudá (emigrantes, alumnos con dificultaes, etc.). En munchos casos, esta indispensable llabor realízase ensin la imprescindible dotación mínima. Ye curiosu que se sigan desviando fondos públicos pa financiar aquellos centros que permiten la reproducción de les inxusticies arriba señalaes. Pero ye una triste realidá.

Dalgo asemeyáu pasa colos ciclos de Formación Profesional de la nuesa ciudá, que siguen siendo insuficientes mientras se subvencionen y financien academies privaes. Amás cola nueva integración de los tres subsectores de la FP en sólo un nun se dieron pasos pa l'asunción de toes estes enseñances pola Escuela Pública, más allá de la política d'allumón que supón la creación de dos Centros Integraos de FP na Escuela d'Hostelería y na Universidá Llaboral. Siguiamos ensin cuntar con ciclos d'inserción llaboral afayadizos p'atender a tolos colectivos en situación de rechazu o exclusión. Y, por últimu, les meyores na dotación de comedores escolares, trabayadores sociales, etc., nun pueden tapecer les importantes llagunes que podemos detectar na rede pública.

V.3.2. El proyectu educativu d'Izquierda Xunida- Los Verdes-Bloque por Asturias pa Xixón

V.3.2.1. El Conseyu Escolar Municipal: representación y participación

Esti Conseyu ye l'órganu de representación y de participación ciudadana básicu pal diseñu de cualesquier proyectu educativu digne. Nelli tán representaos tolos sectores sociales implicaos na educación (AMPAS y sindicatos, partíos políticos, representantes de la Conseyería d'Educación d'Asturies, alumnos y alumnes y presidíu pola Conceyala d'Educación) y tuvo una medria espectacular embaxo'l nuesu mandatu, aconceyando tolos meses y planificando la política educativa de la ciudá dende la participación.

P'algamar entovía más de lo fecho ye imprescindible qu'haya una medria de les competencias del conseyu si queremos que pueda ser capaz de facer analyses, suxerir intervenciones, establecer diagnósticos y colaborar activamente nel diseñu y planificación del nuesu modelu educativu local.



Les sos competencies han abarcar la planificación de la oferta, la distribución y racionalización de los sos recursos y l'alumnáu de los centros públicos, la planificación de les actividaes estraescolares y complementaries. Too ello ha reflexase na elaboración d'un informe añal sobre la situación escolar del conceyu pa la so discusión nos órganos de gobiernu municipales. El Conseyu Asesor Municipal, en llinia con tolo espuesto enantes, tien d'exercer un control efectivu sobre los peligros de la concentración u masificación escolares. Sería necesario dotar a esti órganu d'atributos talos como'l nomamientu de la Comisión d'Escolarización de la ciudá y promover la so capacidá pa empobinase a instancias tales como la Xunta Xeneral y la Conseyería d'Educación, cola fin de que s'estudies les sos propuestes. Amás diba ser necesariu que pudiera participar na planificación de les actividaes complementaries y estraescolares de los centros.

V.3.2.2. Propuestes pa Xixón: Un nuevu impulsu democratizador y popular

N'Izquierda Xunida-Bloque por Asturias-Los Verdes tamos por una Escuela pública, gratuita, democrática, de calidá, integradora y llaica.

-Una **escuela pública**, esto ye, de titularidá pública, porque la educación nun ye un negociu y tien que quedar al marxe de criterios de mercáu; esta escuela tien de garantizar la educación de toos y toes ensin esclusión. Una escuela que seya'l marcu de socialización, integración y aprendizaxe de la nuesa población infantil.

-Una **escuela democrática**, onde s'exerza la democracia, y prepare a los alumnos pal exercicu democráticu; entiéndese la escuela como l'ámbitu educativu onde se garantice la participación de los estamentos que componen la comunidá educativa: profesores, padres, alumnos, personal non docente, instituciones municipales; una xestión democrática que recupere la capacidá pa elixir los equipos directivos de los centros.

-Una **escuela de calidá**: Qu'asegure la educación de tola población infantil, en tola so diversidá, cuntando colos medios materiales y humanos abondo p'asumir cola debida dignidá, la xera d'educar al alumnáu, cualquiera que seya la so situación. Una escuela na se garantice y asegure'l respetu ente los que tienen el deber d'enseñar y el deber y derechu de aprender. Una escuela que prepare pa la vida y el trabayu.

-**Compensadora de les desigualdaes** que por razones de tipu social o de cualesquier otru tipu existen na nuesa sociedá.

-**Integradora** de los alumnos diferentes por mor de la cultura, discapacidá o problemes d'aprendizaxe: De los inmigrantes, alumnos con dificultaes, minoríes étniques.

-**Llaica**, onde les creyencies relixoses permanezan al marxe de la escuela. La escuela llaica ye la más respetuosa cola pluralidá de creos ya ideoloxíes qu'esisten na nuesa sociedá. La escuela de titularidá pública pertenez a l'alministración del estáu, que representa a tola ciudadanía por igual; polo qu'esta escuela nun se pue identificar cola relixón d'un determináu colectivu, lo qu'implicaría la espulsión de los demás.



-**Asturiana**, onde la nuesa llingua y la nuesa cultura ocupen l'espaciu que merecen y salgan de la marxina en que la mantuvieron hasta'l presente.

1. Rede Escolar

a) Competencia Compartida.

Un de los principales problemes que dende IX nos alcontramos a la hora de desenvolver la nuesa política na Conceyalía d'Educación. La planificación escolar, por exemplu, que diba ser más sencilla de desenvolver dende'l conceyu pola so cercanía, depende de la Conseyería, y dexa al Ayuntamientu a la al debalu de les decisiones que se tomen dende fuera de la ciudá.

Poru, creyemos necesario establecer criterios comunes de matriculación dende la creación d'oficines úniques y de la coxestión del sistema cola conceyalía. Nesti sen, propondráse a la Conseyería d'Educación una nueva normativa sobre'l procedimientu d'almisión del alumnáu, que va crear una Oficina única de matriculación, trespasando a la conceyalía'l procesu d'almisión del alumnáu.

Les Oficines Municipales d'Escolarización, embaxo la dirección de la correspondiente Comisión de Matriculación, van asumir les competencies de tramitación, baremu y aplicación de les normes llegalas que rixan el procesu de preinscripción y matriculación del alumnáu de los centros docentes manteníos con fondos públicos. Les oficines tamién van tener la función d'orientar ya informar a les families de la ufierta educativa esistente, ensin prexiciu de la información que puedan ufrir los mesmos centros.

Esixir la puesta en práctica de la Disposición Final Primera de la LOE, en rrellación a los Consejos Escolares de los Centros Concertaos.

b) Rede de 0-3 años.

Nestos cuatro años de Gobiernu Plural de la izquierda, la rede de 0 a 3 años sufrió un importante impulsu al pasar de los tres centros existentes en 2003 a los siete colos que va finir esti 2007. Pesie a esti avance, entavía mos queden munches coses por facer nesta rede, que supón una pieza fundamental na conciliación de la vida familiar y llaboral y que supón l'entamu de la educación nos más pequeños y pequeñes.

Una de les prioridaes tien de ser la integración de les tres redes d'escueles 0-3 existentes na ciudá nuna rede única dependiente de la Conceyalía d'Educación. Amás, en base a la medra de la ciudá y a l'alta demanda de places nestos centros, faese necesariu la creación de nuevos centros y d'ampliación de la ufierta yá esistente na ciudá.



c) Rede de Primaria.

Como señalábamos primero, esiste en Xixón una rede satisfactoria de centros públicos, rede que va quedar perfeccionada cola inminente y históricamente demandada creación d'un gran colexu nel Centru de la ciudá que por fin, y pesie a los innumerables problemes alcontraos, yá ta dando los sos primeros pasos.

De toes formes, esto nun pue significar que mos relaxemos pensando que too ta yá fecho. La Ciudá medra d'una manera imparabile, y esos nuevos grupos de población demanden servicios ente los que s'alcuentra, como nun podría ser d'otra forma, la educación. Poro, va haber qu'estudiar con calma la necesidá de crear nuevos centros públicos nes zones onde seya afayadizo, evitando asina qu'esos unidaes cúbranse a través de conciertos con entidaes privaes.

d) Rede de Secundaria

Garantizar el tresporte de la enseñanza non obligatoria nes zones rurales, pol principiu de la igualdá y oportunidá pa toos y toes. Utilizando la rede de tresporte qu'hai pa la enseñanza obligatoria.

Tamién en Secundaria la rede de centros públicos disponibles ye abondo, aunque creyemos que en Bachilleratu ye necesario consolidar el Bachilleratu Artísticu en más IES de la ciudá.

L'antigüedad de munchos de los centros, y el mal mantenimientu que tuvieron exige una revisión del estáu de les instalaciones, asina como una dotación respuestaria afayadiza pa una rehabilitación en profundidá d'estos centros.

d) Formación Profesional

Tamién la Formación Profesional reglada alcuéntrase acosada por proyectos de privatización más o menos encubiertos. Poro ye imprescindible combatir esta tendencia mediante un efectivu sistema públicu de Formación Profesional reglada, siempre empobináu a proporcionar a la sociedá asturiana bonos profesionales cualificaos. Esti oxetivu pasa por un funcionamientu más áxil y eficaz del Conseyu de Formación Profesional d'Asturies, revitalizándolu mediante la construcción d'un modelu específicamente asturianu qu'integre los tres subsistemes esistentes.

Esta coordinación de los subsistemes reglada, ocupacional y continua tien como oxetu principal la racionalización de la ufierta y evitar la dispersión y duplicidá d'organismos. Como ye lóxico, Izquierda Unida-Bloque por Asturias sofita la constitución d'especialidaes de Formación Profesional na enseñanza pública.

Xixón necesita una comisión de Formación Profesional integrada nel marcu del Conseyu de Desendolcu Local pa garantizar la sintonía ente la ufierta de la FP, la política industrial y los planes de desendolcu locales. Ye dicir, reconocer la importancia de la FP nun modelu de ciudá que siga apostando pol desarrollu industrial y la creación d'emplegu na ciudá que siga apostando pol desarrollu industrial y la creación d'emplegu de calidá.



Esta integración de la FP nes polítiques económiques locales pasa por una ampliación de la oferta pública de FP reglada en ciclos formativos de grau superior (rellacionaos coles titulaciones del Campus de Viesques), **la creación de ciclos d'inserción profesionales en tolos IES** qu'incorporen dignamente a aquellos sectores del alumnáu que nun quieren seguir otru tipu d'estudios y, dende llueu, enanchar mesmo la oferta como los perfiles de la mesma hacia muyeres y inmigrantes. Izquierda Unida-Bloque por Asturias cree que ye necesariu reducir la ratio actual de trenta alumnos por aula por considerala escesiva.

2. Una escuela integradora.

Diciámoslo enantes: pa Izquierda Xunida-Bloque por Asturias-Los Verdes la escuela sostenida con fondos públicos tien de ser una escuela integradora, onde les diferencies por mor de la raza, sexu, relixón o otres d'esi calter nun esistan. La realidá social na nuesa ciudá ta cambiando, cada vegada ye más frecuente la incorporación d'alumnos provenientes d'otros países y cultures, y esti fechu, lloñe de tene-y mieu, tien de suponer l'enriquecimientu de la nuesa educación y de la nuesa mocedá.

a) Inmigración

Ye yá una realidá que la sociedá nel Estáu Español ta cambiando. En pocos años, pasamos de ser un país d'emigrantes a acoyer nes nuses ciudaes a muchos inmigrantes que vienen al nusu país en busca d'un meyor futuru. Y la escuela, imprescindiblemente, nun pue dexar d'atender esta nueva realidá.

Poru, dende Izquierda Xunida-Bloque por Asturias-Los Verdes proponemos que se faga un estudiu de situación del alumnáu inmigrante que derive na celebración na nuesa ciudá d'un Congresu pa tratar el tema, convirtiendo a Xixón en ciudá de referencia en cuanto a l'atención del alumnáu inmigrante.

Tamién va desenvolvese un Plan d'Acoyida Municipal d'alumnos y alumnes inmigrantes, que coordine a les diferentes conceyalíes implicaes nesta cuestión (Servicios Sociales, Educación...) pa una meyor atención a estes persones. Esti plan que necesariamente tien de trabayar coles families, habrá tener un siguimientu por parte d'una comisión lliderada dende la Conceyalía d'Educación, na que tean implicaes mesmo les propies families como les direcciones de los centros.

Amás, otru de los pegoyos fundamentales en cuantes a la inmigración tien de ser l'apoyu definitivu a la formación del profesoráu, que col sofitu y total implicación de la Conceyalía, habrá desenvolvese dende'l Centru de Profesores y Recursos.

Por último, yá como propuestas más concretes, podemos señalar les siguientes:

- a) Comisión d'escolarización qu'estableza criterios pa evitar la masificación d'estos alumnos y distribuyilos pa establecer mecanismos de compensación.
- b) Facilita-yos la participación n'actividaes deportives culturales y educatives.



- c) Establecer presupuestos p'ayudes: Comedores, llibros, viaxes, etc.
- d) Crear una comisión pa mediar nos conflictos.

En quantu al colectivu d'adultos:

Crearíase una Comisión Mixta (Profesores, inmigrantes y alministración) que se plantegaría:

- a) Ampliar les ufiertes d'español pa estranxeros.
- b) Incluir nos programes conteníos multirraciales.
- c) Atender a la formación de muyeres inmigrantes.

b) Atención al alumnáu en riesgu d'esclusión social.

Nos últimos años, viénense desenvolviendo na nuesa ciudá diferentes programes, fundamentalmente dende entidaes ensin ánimu de lucru, que trabayen con alumnos y alumnes que por delles razones enmárquense nun grupu con riesgu de quedar escluyíos mesmo social como educativamente, como pueden ser los programes de la Fundación Secretariado Gitano, el Proyecto Lumbre, etc... En primer llugar tenemos que señalar que munchos d'estos programes y proyectos se tán desenvolviendo con fondos de la Unión Europea, fondos que podríen tar en riesgu de acabar. Poro, la nuesa primer apuesta ha ser el mantenimientu d'estos programes más allá de les subvenciones de la UE, implicando a les diferentes conceyalíes competentes y al Gobiernu d'Asturies.

Como propuestas concretes, podíemos destacar les que vienen darréu::

- a) Potenciar la presencia de los y les educadores y los y les mediadores na Escuela pa que puedan acompañar a los alumnos y les alumnes al so cargu na so incorporación a la vida escolar..
- b) Continuidá de les subvenciones a esti tipu de programes, pa que l'actividá nun quede interrumpida en determinaes époques del añu.
- c) Proponer a la Conseyería d'Educación, como esperiencia pilotu, la inclusión del Educador nel organigrama de la Escuela, como se fizo en Comunidaes como Extremadura y Valéncia.
- d) Intervención coles families, facer trabayos e sensibilización coles mesmes.
- e) Asignar trabayadores sociales de les UTS esistentes a los centros, p que timen desendolquen el so trabyu nos mesmos..
- f) Coordinación ente los profesionales qu'inciden nel alumnáu.
- g) Estudiar la posibilidá d'aumentar les beques de comedores a los periodos vacacionales.



h) Optimizar y coordinar los diferentes recursos existentes na ciudá.

3. Programes Educativos, una forma de facer ciudadanía.

Nesti mandáu 2003-2007 alcontrámosmos cola dificultá de que si bien IX-BA xestionó la conceyalía d'Educación, la inversión municipal en metía de programes educativos dependía de la Conceyalía de Cultura, lo que reducía les nuses posibilidaes de desenvolver polítiques nesti sen. Poro, la pretensión e nueso ye que la seccióne Programes Educativos de la Fundación Municipal de Cultura y la Universidá Popular pasen a depender el próximu mandatu exclusivamente de la Conceyalía d'Educación, pa dotar d'un conteníu real a la Conceyalía.

Una vegada fecha esta tresferencia competencial, dende la Conceyalía y el Conseyu Escolar Municipal, y en coordinación colos consejos escolares de los centros, procederíase a diseñar programes de conocimientu, integración, desendolcu del alumnáu na vida de la ciudá, etc... Estos programes van xirar en tornu a estos temes:

a) Educación pa la salú:

Creación d'una Escuela Popular de Salú. Nesti sen, impartiríanse cursos y talleres básicos, y d'afondamientu sobre la salú física, emocional y social, y osbre actividaes qu'influyen na mesma (agricultura biolóxica, educación medioambiental, seguridá llaboral...) na Universidá Popular.

Contaríase con locales a disposición de colectivos venceyaos cola Salú en tolos aspectos (ecoloxistes, grupos d'apoyu mutuú, asociaciones d'enfermos, plataforma contra les antenes...)

Nesta direición formaríanse promotores de salú pa que fomenten en dellos ámbitos (escuelas, institutos, asociaciones, la cai) a profesoráu y educadores nel Centru de Profesores y Recursos.

Impartiríase formación complementaria pa los y les profesionales de la salú y del ensiñu: apoyu emocional, rrellaciones cooperatives, resolcuión de conflictos...

Na creación d'esta Escuela Popular de Salú, y na so posterior direccióne tendrás mui en cuenta la participación ciudadana, buscando la meyor manera y la forma más eficaz de facelo poro:

- Potenciar la constitucióne de Consejos de Salú de Distritu.
- Promover y potenciar la regulacióne de medicines alternatives.
- Promover y apoyar la llactancia materno, cola participación de los colectivos que yá trabayen nesta direccióne.
- Educar a padres, madres y educadores nel respetu y los bonos trataos a neños y neñes.



- Garantizar la calidá de los comedores escolares, aumentando'l consumu de frutes, verdures y frutos secos y de cultivu biolóxicu.

a) Mediu Ambiente:

Programes de Desarrollu Sostenible concienciación de la importancia del recicláu y reutilización, con visites los Puntos Llimpios, usu d'enerxíes alternatives, etc... **Hasta que la Consejería d'Educación nun modifique la so política consumista y despilfarradora respeto a los llibros de testu, mantener el programa d'intercambiu de llibros.**

Recréu na Natura. Recuperar esti programa pa que los alumnos y alumnes de la ciudá conozan y disfruten los espacios naturales del nuesu conceyu, deprendiendo al mesmu tiempu a conservalos y cuidalos.

b) Cultura:

Visites planificaes, guíes y de baldre a la rede de museos de la ciudá, pa que la mocedá conoza'l padremóñu de Xixón.

Visites a les esposiciones puntuales que se celebren na ciudá y que seyan d'interés especial pa los y les estudiantes.

Realización de selmanes de convivencia inter-centros.

c) Participación:

Programes de concienciación del alumnao de la importancia de la so participación nos centros; nos Consejos Escolares y nes Asociaciones d'Alumnos.

d) Seguridá y Prevención:

Programes de concienciación al alumnáu en temes de seguridá, prevención d'accidentes, etc...

Realización periódica de simulacros d'evacuación de los centros pa conocer el grau del Plan d'Emerxencies y la so eficacia.

Cursos de Primeros Auxilios, estinción d'incendios, etc...

e) Otres actividaes extraescolares.

Dientro de los programes educativos, la Conceyalía d'Educación tien de desenvolver otres actividaes que complementen mesmo al currículu escolar como estos programes. Estes actividaes han ser pa tola ciudá, implicando a tolos centros sosteníos con fondos públicos. Dende Izquierda Xunida-Los Verdes-Bloque por Asturias proponemos:



1. Selmana de la Paz y la Solidariedá en collaboración con ONGD's y el Conseyu Municipal de Cooperación y Solidariedá Internacional.
2. Selmana de la Movilidad, pa fomentar l'usu del tresporte públicu, la bicicleta como vehículu na ciudá, etc...
3. Selmana contra la violencia de xéneru.
4. Selmana de la Memoria Histórica desenvolviendo actividaes que permitan a la mocedá conocer la historia de los sos güelos y güeles, la Guerra Civil, l'Holocaustu, la Transición...

Tamién ye importante la realización de colonies y campamentos e branu, pa seguir fomentando la convivencia ente la mocedá más allá del periodu llectivu, y desenvolver conteníos educativos más allá del cursu escolar.

4. Los centros educativos como espaciu abiertu a la comunidá.

Actualmente, entamóse una llinia col Programa d'Apertura de Centros que pretende fomentar que los Centros escolares seyan una referencia pa la comunidá, nun sólo pa los y les estudiantes y les sos families. Nesti sen, tiense de potenciar esta apertura, y convertir a los centros como espaciu vertebrados de la vida nos barrios.

P'algamalo, amás d'utilizar les instalaciones educativas pa facer actividaes extraescolares, dende Izquierda Xunida-Bloque por Asturias-Los Verdes proponemos qu'estos espacios abran n'horariu non llectivu pa que les asociaciones de vecinos o de cualesquier otru calter les puedan utilizar como espaciu común, potenciando asina l'averamientu ente la ciudadanía xixonesa cola Escuela.

Tamién proponemos la realización d'actividaes lúdico-educatives nos centros, y la creación d'aules d'apoyu con personal docente pa los y les alumnes que lo precisen, ensin necesidá de recurrir del sector priváu.

Amás, pa los y les estudiantes, ye fundamental que puedan facer actividaes d'estudiu, usu de biblioteques, etc... nos centros fuera del horariu llectivu, y que vean el so centru como un espaciu propiu y non como un sitiu al que nun-yos queda otru remedi que dir unes hores al día.



V.3.2.3. El Plan d'Usos de la Universidad Llaboral

La memoria ye fráxil. Hai cuatro años, IX foi l'únicu grupu políticu que concurrió a les elecciones con un planteamientu global respetu a los usos de la Universidad Llaboral. Pasáu'l tiempu de la negociación de les tresferencies, el Gobiernu asturianu decide poner en marcha (¡por fin!) un Plan d'Usos integral. De toos ye sabíu la importante polémica que rodeó a esti plan. Un de los puntos más cuestionaos ye'l más que posible perxuiciu que pue causase a la ufierta educativa mesmo del IES como del nuevu Centru Integráu pa la FP. La contrapartida ye un proyectu con demasiaos indicios d'improvisación y inconsistencia. Izquierda Xunida-Bloque por Asturias-Los Verdes rechaza'l Plan d'Usos promovíu pol Gobiernu y insiste nes siguientes alternatives:

- a) La finalidá principal del Plan d'Usos tien de ser educativa y cultural. La construcción d'hoteles y la so explotación por parte d'empreses privaes significa una espropiación inaceptable del padremónu colectivu de los y les xixoneses. En tou casu, resulta muncho más deseable y razonable la construcción d'una residencia p'alumnos universitarios y universitaries y de FP.
- b) Les ufiertes educatives actuales deben potenciase entovía más.
- c) Izquierda Xunida-Los Verdes-Bloque por Asturias considera necesaria la construcción d'una Residencia embobinada mesmo a universitarios como a alumnos y alumnes de FP nos espacios de la Universidad Llaboral.

V.3.2.4. Enseñances Superiores Artístiques

Izquierda Xunida-Bloque por Asturias-Los Verdes propón la **creación del Conseyu Superior d'Enseñances Artístiques d'Asturies**, que va regular la enseñanza d'estes disciplines na comunidá de mou que s'adauten y seyan homologables dientro del Espaciu Européu d'Enseñanza Superior. Asinamesmo va garantizase que los y les alumnes d'estes enseñances tengan la posibilidá de facer los estudios de doctoráu n'Asturies.

V.3.2.5. Universidad: el Campus de Viesques

Izquierda Xunida-Los Verdes-Bloque por Asturias considera que, dalcuerdu cola concepción de la enseñanza superior como parte sustancial del so proyectu educativu igualitariu y democráticu, el Campus de Viesques –orientáu a la empresa mesmo na so vertiente tecnolóxica como d'organización y xestión- tien e xugar un papel clave na salida de la fonda crisis qu'atraviesa Asturias. Conscientes de la necesidá de concretar esti compromisu, proponemos les siguientes exes d'actuación y midíes:

- a) Ordenación especial del Campus de Viesques como sé de la enseñanza, la investigación y los y les universitaries xixoneses.
- b) Integración de la Universidad Llaboral nel propiu Campus en toles sos facetes.
- c) Integración na Universidad de les Escuelas Universitaries de Trabayu Social y Rellaciones Llaborales.



- d) Reserva de suelu en tornu al Campus, asegurando l'ampliación futura de les titulaciones actuales o la implantación d'otres nueves.
- e) Dotación de servicios como residencies d'estudiantes, guarderíes, comedores, instalaciones deportives..., asina como d'una plantiya de personal nes condiciones adecuades pa garantizar el funcionamientu de tales servicios.
- f) Organización espacial coherente, integrando de manera harmónica los espacios de la Universidá Llaboral, el Parque Tecnolóxicu y el mesmu Campus.
- g) Asignación de recursos materiales y docentes abondo pa garantizar la calidá de la enseñanza y la investigación. Pa ello resulta abondo pa garantizar la calidá de la enseñanza y la investigación. Pa ello resulta imprescindible cuntar con equipos de profesores estables.
- h) Revisión de les comunicaciones del Campus, de mou tal que tando integráu ciudá y suficientemente aisláu como pa facilitar les xeres docentes, alcuéntrese ensin los grandes problemes derivaos del sistema de comunicaciones actual (ruidos, atascos, etc.).
- i) Creación de departamentos lligaos al Campus de Xixón nes aries de conocimientu nes que la docencia mayoritaria impártase en dichu Campus, cuntando cola correspondiente dotación presupuestaria.
- j) Reforzamientu de los servicios d'alministración y xestión, evitando asina los tresllaos innecesarios a Uviéu.
- k) Ampliación de les titulaciones esistentes y implantación de nueves titulaciones nel marcu d'una planificación racional y con perspectives de futuru pa la Universidá asturiana. Too ello íntimamente venceyáu a les necesidaes d'Asturies no que se refier a la formación superior y la so conexón coles polítiques de desendolcu afayadices.
- l) Fomentu, dotación y sofitu a les llinies d'investigación realizaes dende'l Campus.

V.3.2.6. Universidá Nacional d'Educación a Distancia

Nesti momentu, la Universidá Nacional d'Educación a Distancia cuenta con 5.000 alumnos matriculaos. Esta cifra da una bona indicación de les necesidaes que ye imprescindible cubrir pal so bon funcionamientu. El Patronatu Rector, compuestu pola UNED, l'Ayuntamientu de Xixón, Gobiernu d'Asturies y Caxastur ha asumir la responsabilidá de los gastos nel treslláu d'instalaciones, asina como de mantenimientu, profesoráu y alministración d'alcuierdu col incrementu del coste de la vida.

Pensamos que la incertidá respeutu a una ocupación digna nun fai sinón empantanar el desendolcu d'una entidá educativa que supón el 30% de tola población universitaria de Xixón y, incluso, pue llegar a afeutar al mesmu futuru de la UNED na ciudá.



Izquierda Xunida-Los Verdes-Bloque por Asturies plantea la ubicación de les instituciones de la UNED nel Campus Universitariu y que, polo tanto, nun quede desvinculada del Campus de Viesques. Tamién estimamos que les diverses unidaes del Patronatu Rector asuman los gastos contrayíos pol treslláu forzosu de les sos instalaciones. El mantenimientu de les subvenciones pa personal y otros gastos de funcionamientu resulta otru puntu del máximu interés. Too ello cola intención de normalizar de manera definitiva esti importante serviciu educativu.

V.4. LA DEFENSA DE LA LINGUA ASTURIANA Y LA CULTURA, UNA EXA FUNDAMENTAL

Izquierda Xunida-Los Verdes-Bloque por Asturies de Xixón concibe la cultura como un elementu fundamental na tresformación de la sociedá, como instrumentu pal cambiü d'idees y de valores, dende la fidelidá a un *conceyu qu'aspiramos a que cada día seya más mestizu, antimilitarista, multicultural y billingüe*. Poro, pa nos los filos conductores que van presidir les nuses propuestas van ser la busca de:

- Lo plural, diverso y complexu.
- Lo democráticu.
- La identidá que fomente l'autoestima d'Asturies como pueblu coles sos carauterístiques especiales, potenciadora de realidaes culturales más amplies.
- La capacidá crítica, motor de progresu integral de la humanidá.

Nesti orde de coses, podemos definir los distintos obxetivos sobre los que pivota'l nuesu programa políticu-cultural.

V.4.1. Cultura y desendolcu socioeconómicu

La cultura como factor de desendolcu harmónicu y sostenible ha tener presente'l cada vegada mayor pesu de la industria d'esti sector y la so importancia dientro del actual panorama empresarial, fomentando'l desendolcu y la consolidación de les empreses y grupos profesionales locales, asina como'l turismu cultural.

Dientro d'una perspectiva de progresu, nun cabe conceptuar les polítiques culturales como simple ocupamientu d'ociu; trátase de conxuntos d'actuaciones qu'inciden direutamente sobre'l desarrollu de les comunidaes. Nesti sen, el presupuestu de cultura tien de ser entendíu como una inversión nel modelu de ciudá y de sociedá que pretendemos.

Nesti ámbitu, dende Izquierda Xunida-Los Verdes-Bloque por Asturies de Xixón propónse:

- Xenerar programes qu'estimulen la creatividá nos ámbitos artísticos y comunicativos.
- Desenvolver programes de formación profesionales en trabayos venceyaos cola actividá cultural.



- Potenciar les distintes infraestructura culturales insuficientemente dotaes, tales como'l Teatru de la Cátedra Xovellanos d'Estensión Universitaria, la Escuela de Peritos..., que dean respuesta a les necesidaes culturales tradicionalmente reivindicades por dellos sectores sociales, como son la Escuela Municipal de Música, Escuela Municipal de Música Tradicional, los sitios d'ensayu pa músicos y plásticos, etc.
- Crear un Centru Cultural de Cimavilla de primer nivel nel edificiu de Tabacalera de Xixón, que tenga en cuenta a diferentes colectivos de la ciudá pa elaborar un Plan d'Usos pa esti equipamientu.
 - La rellación de Xixón col cine ye llarga y continuada nel tiempu, la primer proyección de cine fecha n'Asturies fízose na Biblioteca Xovellanos, el Festival Internacional de Cine... La Filmoteca d'Asturies lleva un llargu tiempu reclamando un espaciu propiu, una sé digna, poro consideramos que la **Filmoteca d'Asturies ha tener la so sé nel Centru Cultural de Cimavilla.**
- Establecer el gran Centru Cultural de Xixón, tamién entendíu en términos xeográficos, que va tar configuráu pol Centru Cultural de Cimavilla mencionáu enantes, el Muséu Casa Natal de Xovellanos, les Termes Romanes, el Palaciu de Revillaxixéu y la Colexata de San Xuan Bautista, el Muséu Barjola, l'Antiguu Institutu Xovellanos, la Biblioteca Pública, l'actual Escuela d'Empresariales, l'Atenéu Xovellanos, el Muséu Piñole, el Teatru Xovellanos, la Ciudadela de Capua,..., sales d'esposiciones privaes, con una programación coordinada y por obxetivos, que respetando los intereses privaos tean inspiraos nel interés públicu, con conteníos de calidá y interés contrastaos, qu'enriquezan a la ciudadanía xixonese y constituyan un atractivu más pa programar visites turístiques a Xixón.
 - En rellación cola Ciudadela de Capua la puesta en marcha d'un Plan de Revitalización que tenga en cuenta'l papel a xugar polos sindicatos.

V.4.2. Llingua y cultura asturiana

Un de los llogros d'esta llexislatura en materia de promoción de la llingua asturiana foi la ellaboración del Primer Estudiu Sociollingüísticu del Conceyu de Xixón que tenía l'oxetivu de conocer la situación actual de los usos llingüísticos y de les distintes situaciones sociollingüístiques de la población y analizar los resultaos pa poder planificar la política llingüística del Conceyu.

Pos bien, nesti estudiu la mayoría de la ciudadanía de Xixón, en concretu cinco de cada diez, asegura espontáneamente que la llingua propia de Xixón ye l'asturianu. Al mesmu tiempu un 52,2% identifica'l rexistru asturianu como la llingua materna, mientres qu'un 47,7% considera que l'asturianu ye mui o diferente del castellano.



Dende Izquierda Xunida-Los Verdes-Bloque por Asturias entendemos que la situación sociolingüística de Xixón presenta los componentes típicos d'una situación de marxinaición y falta de normalización, na qu'a pesar de qu'una mayoría ciudadana amuesa una identidá llingüística asturiana, entavía nun s'algamó que la llingua seya protexida y valorada.

Y ello a pesar de los esfuerzos en solitariu que dende IX-BA realizamos nos últimos 4 años nos qu'alcontramos col vetu casi paranóicu de la mayoría socialista nel Gobiernu municipal no que respecta al usu y promoción de la llingua asturiana. Sicasí algamóse la puesta en marcha de la Oficina de Política Llingüística de Xixón y el Conseyu Asesor de la mesma, con un funcionamientu que mos comprometemos a meyorar.

Defendemos lo propiu, apostamos y nos abrimos a otres espresiones, facémosles de nueso y construyimos cultura común dende la izquierda. Reforzamos la nuesa idega d'Asturies como país, d'autoestima como pueblu, de la defensa de les nuses señes d'identidá, de la protección y fomentu del nuesu padremuñu cultural, del reconocimientu de la nuesa llingua, dientro d'un proyectu global p'Asturies.

Propuestes d'Izquierda Xunida-Los Verdes-Bloque por Asturias:

- Aprobación d'unes Ordenances Municipales que regulen l'usu de la llingua asturiana en Xixón, posibilitando d'esa forma la so normalización.
- Usu del asturianu en toles publicaciones oficiales del Conceyu asina como en toles retulaciones (cais, places, departamentos...)
- Emplegu de *Xixón* como'l nome de la ciudá y del conceyu.
- Realización de cursos de formación en llingua asturiana pal personal funcionariu y llaboral de la Casa Conceyu col oxetivu de que puedan atender afechiscamente a la ciudadanía.
- Realización d'una preba adicional nes d'Accesu al Emplegu Públicu na que se valore'l conocimientu de la llingua asturiana.
- Potenciación de la Oficina de Política Llingüística con una ubicación na Casa Nava disponiendo d'un espaciu propiu pa usu esclusivu de la Oficina.
- La Oficina de Política Llingüística va exercer una xera tresversalizadora, polo que va depender d'una conceyalía presente na Xunta de Gobiernu.
- Sofitu a la normalización social del usu del asturianu ente la población del conceyu.
- Nomamientu nel Plenu Municipal de los componentes del Conseyu Asesor de la Llingua de Xixón. Los y les integrantes d'esti conceyu van designaos como Conseyeros, en condiciones similares a les de les y los miembros del Conseyu Escolar Municipal.



- Potenciación del Muséu del Pueblu d'Asturies como espaciu museísticu vivu al serviciu de los estudios etnográficos d'Asturies, que va tener como una de les sos llinies prioritaries recoyer toles tradiciones orales, convirtiéndose nun archivu funcional al serviciu de los y les usuaries potenciales.
- Creación de la Escuela de Música Tradicional, que va mantener un permanente contactu coles Escuelas de Música tradicional esistentes en Xixón.

V.4.3. Democracia cultural y sociedá

Frente a la tendencia creciente hacia'l consumu de productos culturales, propugnamos una actuación política onde s'estimule la participación activa de la ciudadanía énte les tresformaciones sociales y técniques. Construyendo una cultura que tresforme los valores que configuren la nuesa sociedá, potenciando idees como solidariedá, respetu a lo distintu, valoración del entornu, afirmación de lo propiu.

Nesti ámbitu, dende Izquierda Xunida-Los Verdes-Bloque por Asturies de Xixón propónse:

- Reorganizar la rede de centros municipales de forma que se conviertan n'auténticos impulsores de polítiques integrales empobinaes a los barrios de Xixón.
- Creación d'organismos de participación ciudadana nos centros municipales.
- Disposición prioritaria de les instalaciones y recursos de los equipamientos culturales pal usu d'entidaes ciudadanes.
- Estímulu al desendolcu del texíu asociativu local, mediante una política de subvenciones y convenios, que garantice la financiación afayadiza, al tiempu que se garantiza la non inxerencia de l'Alministración pública nel funcionamientu d'estes asociaciones.

V.4.4. Los servicios municipales de cultura

Ye necesaria una política cultural guiada por obxetivos de progresu, útil pal conxuntu de les persones. Una política cultural que xustifique la inversión fecha y que, pa ello, alcuéntrese integrada nuna estratexa global de procesu solidariu.

La rede d'equipamientos municipales, asina como la demanda cultural de la ciudadanía, esperimentó una medra visible nos últimos años. Pero necesítase una reorganización de los servicios culturales municipales, adptándolos a la nueva realidá.

L'aición cultural municipal tien como principal instrumentu a la Fundación Municipal de Cultural, Educación y Universidá Popular (FMCEyUP), que supón una importante aportación a la vida cultural de la nuesa ciudá. Pero les llimitaciones esistentes nel so sistema de xestión impliquen l'estudiu de los necesarios cambios a adoptar.



Poru, dende IX IU-Los Verdes-Bloque por Asturias propónse:

- Abordar una reorganización de la Fundación Municipal de Cultura, Educación y Universidá Popular, orientada hacia la obtención de mayores rendimientos sociales a la fuerte inversión esistente, superando'l burocratismu actual.
- Desenvolver estratexes de coordinación ente los servicios culturales municipales, orientaes a ordenar y optimizar recursos.
- Plantegar estratexes integraes, con base nos barrios, que desenvuelvan programes qu'impliquen a les fundaciones y patronatu n'actuaciones conxuntes, incidiendo sobre sectores y problemátiques concretes de la población.
- Ampliar los horarios de los equipamientos municipales, adecuándolos a les necesidaes de los y les usuaries.
- Redefinir y reestructurar la política museística.
- Retomar el Mapa Cultural de Xixón al que mos vamos referir más alantre, ellaboráu como instrumentu de midida de les necesidaes que nesti campu tien la ciudá y puesta en práctica de los sos resultaos.
- Política de recursos humanos que frene l'actual corriente de subcontrataciones y que defina y equipare les distintes modalidaes de trabayu esistentes pa les memes funciones, en vistes a un conveniu únicu nel marcu municipal.

V.4.5. Creación

Les xentes del arte y la cultura, y especialmente los y les artistes y artesanos y artesanes son la punta de llanza y la manifestación explícita de la riqueza cultural d'una comunidá. La calidá de les producciones artístiques son el resultáu d'un complexu entramáu de factores ente los que destaquen: la formación, les ayudes económicques, el consumu cultural y los espacios pa la producción y difusión de les propuestas artístiques.

Propuestes pal incentivu de la creación artística: formación, producción y difusión.

- Estimular la producción artística local, con equipamientos, programes y incentivos específicos.
- Facilitar y promover l'accesu de los y les creadores a les nueves tecnoloxíes.
- Estimular la formación artística de mou qu'esta nun seya impartida únicamente polos centros "reglaos". Desenvolver ufiertes de formación artística de diferentes tipos y niveles que permitan satisfacer la demanda potencial que xenere'l territoriu.



- Proporcionar a la ciudadanía espacios pa la creación y producción de les diferentes propuestas artístiques surdies de la propia comunidá, nos que solo se muestre'l productu final, sinón tamién el procesu creativu.
- Fomentar una política de rellación direuta ente les programaciones artístiques y la escuela, especialmente nel campu de les artes escéniques y audiovisuales.

V.4.6. Mapa cultural de Xixón

Pa marcar les estratexes a seguir nel desendolcu de les propuestas d'enantes, por iniciativa d'IX púnxose en marcha la elaboración del Mapa Cultural de Xixón, como instrumentu de midida de les necesidaes que nesti campu tenía la ciudá; ye agora'l momentu de poner en práctica los resultaos d'esti estudiu, que pasa por una reorganización de los equipamientos y por un replantegamientu de les polítiques d'actuación.

La nuesa ciudá necesita una política cultural que valga pal desendolcu d'estratexes integraes, qu'afronte los problemes reales de la nuesa ciudá. Ye necesaria una política cultural guiada por obxetivos de progresu útil pal conxuntu de la ciudadanía, y non simplemente diseñada pa una minoría; una política cultural que xustifique la inversión fecha y que, pa ello, alcuéntese integrada nuna estratexa global de desendolcu solidariu.

Esta estratexa global de progresu habrá asentase sobre un ampliu consensu ciudadanu, qu'impulse una política cultural de la ciudadanía, pa la ciudadanía, política cultural que dea respuestes a les necesidaes y problemes que plantea la evolución de la sociedá.

V.5. DEPORTES

Güei más que nunca y n'especial na nuesa ciudá, el deporte ye un fenómenu social qu'abarca a toles capes sociales, que trescendió edaes, niveles culturales o económicos, siendo cada vegada mayor el númberu de persones qu'abandonen la visión del deporte como un espectador pasivu y prautiquen, con mayor o menor intensidad, una disciplina deportiva de calter lúdicu o de competición. L'aceptación del deporte xeneralizóse na sociedá, pero'l so desarrollu, como ye lóxico nun, ye uniforme, alquiriendo un papel primordial na so promoción al apoyu dende les instancies públiques, les cualos tienen la obligación d'establecer les condiciones y infraestructura pa que l'actividá deportiva se desenvuelva, respondiendo a la demanda de lo que se considera un bien social.

Siendo'l deporte y los sos temas asociaos un factor presente na vida política de la ciudá, n'ocasiones con protagonismu principal y trescendencia política de fondu, onde IX tuvo un discursu propiu y protagonismu diferenciáu. Too esto oblíganos a seguir afondando nes nuses propuestas de calter deportivu como un apartáu más de la nuesa política nel modelu de ciudá que deseamos pa Xixón.



IV.5.1. Propuestes deportives

1) Deporte escolar

Dende IU-Los Verdes-Bloque por Asturias, al deporte escolar vémoslu como la base sobre la que tien de cimentase'l desendolcu de les disciplines deportives ente la mocedá, con especial atención al so valor formativu y como mediu d'implantación de valores qu'han tar venceyaos a la práctica deportiva (non violencia, autocontrol, disciplina, camaradería, cooperación, etc.). Pa esto la collaboración y coordinación ente los centros d'enseñanza a través del conseyu escolar y el Patronatu Deportivo Municipal y les asociaciones de padres y madres tien d'afondase. Nesta xera de difusión del deporte ente la mocedá, les escuelas deportives resulten un instrumentu efectivu, siendo los monitores deportivos la pieza fundamental, la que, al xuiciu de nos, tien de ser continuamente perfeccionada.

Propuestes pal deporte escolar:

1. Siguir y perfeccionar les escuelas deportives en colexos públicos con programes de collaboración con federaciones, clubes y asociaciones. Acabar de cubrir toles canches poldeportives de los colexos públicos.
2. Creación de les olimpiaes escolares municipales.
3. Torneos municipales na categoría benxamín, alevín y infantil.
4. Programes específicos pa neños y neñes con minusvalíes o inadaptaciones.
5. Equipamientu deportivu nos centros escolares.
6. Implantación de programes específicos pa la promoción del deporte ente les neñes.

2) Deporte base y deporte popular

La continuidá y ampliación del apoyu al deporte base y popular ye dende Izquierda Xunida-Los Verdes-Bloque por Asturias, una pieza clave nel desendolcu de l'actividá deportiva na nuesa ciudá y lo qu'en gran midida permite la riqueza en clubes y diferentes disciplines deportives que se dan na nuesa ciudá.

Propuestes pal deporte base y popular:

1. Promocionarase l'animación deportiva en barrios.
2. Potenciaranse torneos y campeonatos de calter municipal.
3. Estableceranse convenios de collaboración con clubes y federaciones empobinaes al apoyu del deporte de promoción y deporte base de lligues menores, faciendo un especial esfuercu coles disciplines deportives menos difundíes.
4. Potenciarase la práctica de deportes alternativos de calter lúdicu.



5. Impulsarásen la recuperación y promoción del deporte asturianu (bolos, llave,...) y xuegos recreativos tradicionales, mediante la difusión de la so práctica en colexos y na rede del Patronatu Deportivu Municipal, apoyando torneos, campeonatos y competiciones, cola creación de premios de calter municipal.
6. Tratarásen de recuperar nel conceyu la práctica de tradicionales deportes náuticos como son les regates de bateles, traineres y trainerilles.
7. Establecerásen programes específicos d'actividaes deportives pa neños y neñes con minusvalíes.
8. Realizarásen convenios con asociaciones de clubes pa la subvención de les fiches federatives de les categorías inferiores.
9. Creación d'un aria deportiva complementaria colo esistente actualmente en Perchera –La Braña, que favoreza un conxuntu de disciplines deportives pa tola zona.

3) Deporte profesional

Dende Izquierda Xunida-Los Verdes-Bloque por Asturias afirmamos que determinaos clubes han formar parte de la identidá de la ciudá y como tales merecen un apoyu prudente y responsable dende les instituciones públiques, siendo condición pa ello, la responsable xestión de los y les sos direutivos y direutives y que l'actividá diaria d'estos clubes, honestidá, deportividá y tresporencia, resulten una imaxe positiva pa la ciudá.

4) Propuestes d'instalaciones deportives

1. Meyora de les instalaciones deportives nel aria rural.
2. Creación d'una pista natural pa la práctica de la bicicleta de monte nel monte de Deva.
3. Creación del nucleu deportivu de La Camocha con piscina de 25 metros, minipabellón y pista de tenis..
4. Consolidación de la pista cubierta del Lauredal como segundu nucleu deportivu de La Calzada, mediante la so conversión en minipabellón con pistes de tenis al aire llibre.
5. Creación d'una estación náutica municipal que facilite l'accesu a los deportes náuticos.
6. Instalación nes cuadres de Les Mestes d'una escuela municipal d'equitación.
7. Realización d'un proyectu de calter global pa Les Mestes que la consolide como una gran importación deportiva municipal.
8. Construirásen y meyorarán circuitos y rutes afayadizos pal senderismu, bicicleta y *footing*.



9. Señalizaránse circuitos pal senderismu y *footing* (Campa Torres al parque del Lauredal, Plaza Isabel la Católica, La Providencia, ruta Roces La Camocha).
10. Va siguisse cola instalación de mobiliariu urbanu de calter deportivu en parques y zones verdes.

V.6. OCIU

La más tardía incorporación al trabayu, el crecimentu de la esperanza de vida, munches vegaes xunta a la circunstancia de situaciones de prexubilación, y en conxuntu un incrementu del nivel y calidá de vida, dieron nel nuesu tiempu sitiú a una nueva cultura o dimensión cultural, la cultura del ociu. Por embargu, por una falta d'educación pal ociu nel pasáu y por una perdeficiente ufierta de conteníos, consumimos ociu de conteníos y forma inadecuaos pa la nuesa salú personal y social, pa la convivencia, pa la solidariedá. Poro nun queremos que faltara un a referencia explícita a esti fenómenu nel nuesu programa, el programa d'Izquierda Unida-Los Verdes-Bloque por Asturias de Xixón.

IV.6.1. Educar pal ociu

Una cultura d'ociu alternativu va ser frutu d'un procesu d'educación pa la llectura, la visión crítica de televisión, cine y teatru; educación pa correr y pasear, pal cultivu de Güertos d'entreténimientu; educación pa la participación en fiestas populares y patronales, pal disfrute d'espectáculos deportivos y práctica deportiva adaptada a cada momentu y edá ...

Articular un programa d'educación pal ociu, fecho más de bones práctiques que de teorías, col oxetivu de compartir un ociu enriquecedor, alternativu, solos o en compañía, ensin drogues, alcohol nin tabacu, recreando l'espíritu y potenciando'l cuerpu, tamién ye una xera municipal. Criterios, argumentos pa la so comunicación y alderique, formes pa ponelos en práctica, evaluación y ellaboración de conclusiones pa reentamar el procesu dende l'entamu..., podemos y debemos facelo. La Fundación Municipal de Cultura y Universidá Popular, la sociedá Teatru Xovellanos, el Patronatu Deportivu Municipal, l'Aria Municipal de Festeyos..., caúna dende'l so ámbitu, han contribuyir nesta xera d'educación pal ociu.



V.7. PAZ Y SOLIDARIEDÁ

V.7.1. Tan cerca, tan lloñe...

Dende la convicción d'Izquierda Xunida-Bloque por Asturias-Los Verdes, y más allá de sentimientos idealistes humanitarios, que tamién, ta'l convencimientu de que los intereses de los pueblos son sustancialmente comunes perenriba de les fronteres. Poro los conceyos han tener una visión conxunta mesmo de les aspiraciones como de los intereses de los pueblos que paez se van lliberando de la presión del imperialismu y multinacionales.

Por estes razones, la visión internacionalista d'Izquierda Xunida-Bloque por Asturias-Los Verdes paezse bien poco a determinaes práctiques caritatives o filantrópiques de dalgunos colectivos, sinón que se trata d'una forma de solidariedá eminentemente política.

Nesti sieglu XXI qu'acabamos d'estrenar, dende los países más poderosos, publicítose a bombu y platiellu los parabienes d'una globalización que va valir, según mos cuenten, pal desendolcu de tolos pueblos que convivimos nesti mundu, pa que les distancies acórtense y haya más rellación ente unos y otros. La movilidad xeográfica de la población, la deslocalización empresarial, les oportunitadaes que mos brinden, son otros de los eslóganes que s'utilicen pa vendenos l'inventu.

La realidá mostrónos, y nos lo muestra día tres día, que lo único qu'interesa a los poderosos nel procesu de mundialización ye la eliminación de fronteres a los capitales, lo que non significa evidentemente que s'invierta nos países menos favorecíos, o más esquilaos, por tanto con dificultaes pa desenvolvese, sinón qu'esta situación de debilidad interesa, porque asina vamos poder seguir esplotando a los más probes (a les persones y a los recursos naturales), p'algamar el menor preciu de los productos, preciu que nun se reflexa no que paguen los consumidores de los países del primer mundu, sinón nes cuentas de resultaos de les multinacionales.

El resultáu de toa esta política ye evidente. La desigualdá ente ricos y probes ye cada vegada mayor y la situación, lloñe d'alliviase, agrávase cada vegada más col tiempu. Y pesie a les bones intenciones, les bones pallabres, nengún poderoso tomaron verdadera conciencia del programa. O quiciabes deberíamos dicir que nun-yos interesa tomala, porque, por munchu que mos intenten engañar, el sistema de ricos y probes ye básicu nel modelu capitalista qu'imponen.

Güei como ayeri, partimos de la certeza, como foi siempre, y lo sigue siendo nesti mundu globalizáu, que la llucha contra l'probeza y la desigualdá, la defensa de la soberanía nacional, y contra l'imperialismu, el desendolcu de la democracia y los avances hacia una sociedá más igualitaria en cualesquier llugar del mundu, obedez a la nuesa posición política y por tantu goza de les nuses simpatíes.

Exemplos, puédense poner munchos, yá tamos viendo dalgunos, sobre too en Centromérica, Caribe y América del Sur.



Nesti contestu de solidariedá internacionalista, de respetu a la soberanía de los pueblos, lleven apareyáu una concepción nesti terrén como ye l'antimperialismu. Non solo debemos ayudar, el compromisu políticu pasa tamién por ser capaces de denunciar la barbarie tradicional del imperialismu, guerres, invasiones, espolios, xenocidios, etc... sinón de comprender les sos nueves formes d'intervención y dominación cultural y económica de la globalización.

A la situación cubana, siempre dispuesta a poner personal sanitariu y solidariedá internacionalista ente cualquier catástrofe del tipu que seya, súmase Venezuela y el so plan bolivarianu, y últimamente Bolivia con Evo Morales al frente, dexando per toa Europa patente, que son propiedá de los y les bolivianos les materies primes qu'esploten les multinacionales, ente elles españoles, que poco o nada redunden en beneficiu del pueblu y sí de manera absoluta en beneficiu de los y les aicionistes de Repsol, Telefónica, BBV, Bancu de Santander, etc... por supuestu, hai quien diz qu'estes trasnacionales son meyores que les norteamericanes, seguru que sí, y al final ¿qué?.

Alcuentros, cumales, convenios, alcuerdos ente países d'estes llatitues, como se vienen celebrando nos últimos años, la que sumen más recientemente los trunfos de Correa n'Ecuador y el Frente Sandinista, con Daniel Ortega al frente, en Nicaragua.

Esi ye'l camín, el camín de fondu, non el de forma nin del repartu de la miseria. Poro, tenemos que prestar atención a esos nuevos fenómenos políticos y sociales que tán surdiendo nesos países de los que falamos primero. Trátase de países distintos, de procesos diversos, y como nun podía ser d'otra forma al tratase de fenómenos políticos y sociales, non esentos de contradicciones.

Los convenios, alcuentros, protocolos, hermanamientos... son figures que mos permiten nesti contestu de solidariedá internacional, preseos básicos que mos faen ver y comprender mejor el respetu a la diversidá, al tiempu que contribuyir al desendolcu de los pueblos y la so evaluación y lliberación.

Dende los Presupuestos Municipales de 1989, en Xixón cuéntase con un partida denominada Solidariedá Internacional. Entamó inicialmente con una partida casi simbólica, 16 millones de pesetes, frutu d'un pactu presupuestariu ente Izquierda Xunida y el PSOE. Al añu siguiente, l'anterior alcalde, Tini Areces, pacta col CDS, y la partida reduzse al 50%, ye dicir, 8 millones de pesetes. En 1993 configúrase'l Conseyu Municipal de Cooperación y Solidariedá Internacional, col votu en contra del Partíu Popular.

Dende'l 1 de xineru de 1995, en Xixón cuéntase col 0,7% y +, ensin trampa nin cartón, tamién col votu en contra del PP. Una cenciella operación aritmética a aplicar sobre'l Presupuestu Xeneral Municipal. Nesti añu 2007, más de 1,5 millones de €, 1 millón a Proyectos de Cooperación vía ONGs y otres asociaciones, y el restu a compromisos institucionales del Gobiernu de Xixón.



Compromisos económicos, compromisos políticos, una política orientada a Centroamérica y Caribe, a América del Sur, a Palestina y Sah.ara, fundamentalmente. Doce años d'hermanamientu con Ciudá de L'Habana, once años con Smara, protocolos firmaos con Montevideo pa 2005 a 2007, que va haber que prorrogar, hai meses cola ciudá de Belén en Palestina, y más recientemente cola Municipalidá San Salvador, col Frente Farabundo Martí a la cabeza.

Convién destacar nestos últimos años los graos e collaboración y d'intervención común ente'l Gobiernu d'Asturies y el Gobiernu de Xixón, que permiten concretar proyectos de gran envergadura en materia de vivienda, salú, educación, saneamientu, etc...

A los casos comentaos hai qu'añadir Achacachi en Bolivia, Villa El Salvador en Perú, asina como otres desenvolviéndose en El Salvador y Nicaragua. Nejapa, Santa Tecla, Tonalá, Puerto Morazán, son llugares nos qu'Asturies y Xixón resúlten-yos nomes d'amistá y solidariedá, al igual qu'otres llatitues como Buenos Aires colas Madres de la Plaza de Mayu, en Santa Fé colos nuestos collacios de los Sin Techo, o en Brasil col Movimientu de los Sin Tierra.

Naide dulda de que lo más necesariu p'algamar los niveles que se marcó la ONU n'erradicación de la probitú, la fame y les pandemies qu'asolen al llamáu Tercer Mundu ye la inversión económica ensin contraprestaciones, embaxo un principiu e solidariedá ente pueblos que pocos paecen entender.

Por eso, en Xixón, dende hai unos años, con un gobiernu plural de la izquierda afondáu nesa dirección, se ta poniendo especial esfuerzu n'ayudar a aquellos que lo necesiten especialmente en dos direcciones: la primera, con una declaración política del Gobiernu Municipal de la ciudá poniendo de manifiestu que Xixón ye una ciudá d'acoyida y la segunda, con un compromisu políticu dexando claro que la nuestra aportación nun ye únicamente económica.

Por estes razones tenemos una visión global del mundu y buscamos como referentes a aquellos países que lluchen por lliberarse, siempre dientro de les nueses llimitaciones, que son munches, pero entavía asina pensamos qu'alcuentros como esti, reflexones compartíes, tamién van ayudar a avanzar.

Les propuestas d' Izquierda Xunida-Bloque por Asturias-Los Verdes pal periodu 2007-2011 son les siguientes:

- Impulsar un aumentu cualitativu de la contribución de Xixón al desendolcu pasando del 0,7% al 1% como oxetivu inmediatu d'esta llexislatura.
- Potenciar los protocolos d'amistá y los convenios con ciudaes afeutaes pola violencia imperialista o que s'hayan destacáu polos sos valores solidarios, y establecer hermanamientos con aquellos nes qu'estos movimientos tean consolidaos.
- Potenciar la Cooperación Internacional del Ayuntamientu a aquellos ciudaes que cumplan lo espuestu nel anterior puntu, y mantener y aumentar les subvenciones a ONGD.



- Reforzar los contactos institucionales y sociales con países como Cuba, Brasil, Venezuela y otros, afeutos por unes crisis y unes polítiques depredadores impulsaes por organismos (Fondu Monetariu Internacional, Bancu Mundial...) al serviciu de les élites globales y cola complicidá y collaboración activa d'Estaos como l'español.
- Entamar midíes de presión contra les entidaes financieras y empresariales de cualesquier tipu que potencien les mencionaes polítiques depredadores. Pa ello, esiste un ampliu abanicu de posibles aiciones específiques reivindicativo-informatives na cai y nes asociaciones ciudadanes, hasta'l llamamientu al boicot activu o la retirada d'ayudes por parte de les instituciones.
- Promover, dende les instituciones campañes participatives nel texíu social xixonés en tornu a cuestiones y problemátiques específicos de la situación na que s'alcuentra actualmente'l nuesu mundu.
- Declarar Xixón ciudá antimilitarista, solidaria y pacifista e impulsar la respuesta ciudadana ente cualesquier tipu d'agresión bélica o de control económicu exercíu pol bloque neolliberal.
- Alendar les iniciatives ciudadanes y asociatives pa conformar un frente anti-imperialista qu'axunte a colectivos y persones procedentes de la mayor variedá d'ámbitos y tendencias posibles.
- Apoyar de manera firme y ensin dobleces los proyecto de recuperación histórica de les clases populares y de los movimientos obreros y democráticos de la ciudá.

VI. POLÍTICAS SECTORIALES PA UN XIXÓN MEYOR

A lo llargu y anchu d'esti programa, hai temes tresversales que salen equí y allá, n'urbanismu, cultura o emplegu. Ente otros exemplos, podemos falar de les polítiques venceyaes cola muyer, la mocedá, colos mayores, colos discapacitaos. Por embargu, paeznos importante destacar dalgunes d'estes polítiques específicamente, como ye'l casu de les tocantes a la muyer y a la mocedá. Destacar éstes de nenguna manera quier quitar pesu e importancia al fenómenu de les persones mayores, de los y les xubilaes y pensionistes... ¿Cómo no podríamos escaecer de les 55.000 persones mayores de 65 años qu'hai en Xixón, casi 20.000 de les cuales tienen más d'ochenta años nuna ciudá de 270.000 habitantes, con pensiones en munches ocasiones que nun-yos permiten atender les necesidaes básiques y específiques de la so edá y momentu? Imposible pa homes y mueres d'izquierda, d'Izquierda Xunida-Los Verdes-Bloque por Asturias, que somos conscientes de que, cuanto somos y tenemos, elles algamáronoslo con sangre, sudor y llárimas. ¿O de los discapacitaos, precisamente nel Añu Mundial de la Discapacidá y nun mundu qu'elimina una barrera y crea dos al mesmu tiempu? A unos y unes y otros y otre dedicamos respetivos apartaos nel capítulu de política social o servicios sociales d'esti programa.



El cambiu y la tresformación social que propugnamos pal nuesu conceyu pasa obligatoriamente pol reconocimientu de les muyeres como seres individuales llibres, suxetos reales de plenu derechu y copartícipes de toles xeres qu'esixe aquel cambiu social. Igualmente, el sector más demandáu al tiempu que golpiáu poles polítiques neoliberales, la mocedá reclama, como'l de la muyer, polítiques d'aición positiva que remarcamos nesti capítulu.

VI.1 POLÍTQUES DE MOCEDÁ

Los mozos y moxes d'Izquierda Xunida-Bloque por Asturias-Los Verdes creyemos que la ciudá de Xixón evolucionó en mou favorable a lo llargo del tiempu, dende los momentos de la reconversión industrial que supusieron una crisis de gandes dimensiones y que de la que paecía nun haber salida nel mediu plazu. La reorientación de la ciudá a nuevos planes económicos que la ficieron llevar y l'abrieron a incipientes nueves perspectives que por embargu han impulsase más ue nunca, pos vislumbase nel tiempu inmediatu la posición que tien d'ocupar la nuesa ciudá durante les décadas siguientes. La ciudadanía tien de ser capaz d'asumir esti momentu con valor y decisión: volver a la crisis de los 80 y 90, o optar polo que tien de sustentar y rellanzar la ciudá, el futuru, esto ye la mocedá. Esto hemos de ser capaces de facer ver que va ser solu a través de la izquierda real, Izquierda Xunida-Bloque por Asturias-Los Verdes.

Entendemos que Xixón ye una ciudá enormemente viva, tien una actividá cívica y ciudadana realmente envidiable, y ye dende equí sobre lo que se tien de trabayar na ciudá, y particularmente dende IX-BA-LV. Da-y a la mocedá la posesión de la mesma tien de ser prioritariu nel programa de mocedá. Face-yos ver que son el fin últimu y nosotros el mediu p'algamalo.

Amás la mocedá tien de ser capaz de ver nel nuesu programa políticu les respuestes prioritaries y primordiales d'anguaño. Esto tien de poder algamase mediante l'incentivu de la emancipación, la que, ensin querer ser ambiguos, pasa por algamar la so independencia económica. Esto tien d'algamase mediante les polítiques d'emplegu y vivienda y confiriéndu-yos una protección pública que pueda esimilos, dependiendo de la situación, de cargues nos servicios públicos, de mou talu que determinaos mozos y moxes puedan ser oxetu de reducciones fiscales, de la gratuidá del tresporte públicu, etc. Tien de buscarse la eliminación (en tolo que seya posible) de la carga pública xuvenil.

Pa Izquierda Xunida-Bloque por Asturias-Los Verdes, la Conceyalía de Mocedá tien necesariamente que, amás de desenvolver les sos funciones propies, ser coordinadora de les polítiques de mocedá que se desenvuelvan dende les otres conceyalíes, y les polítiques de mocedá han ser tresversales en tol Ayuntamiento. Poro, creyemos que la delegación de Mocedá tien de depender d'una tenencia d'alcaldía, y pertenecer polo tanto a la Xunta de Gobiernu, y tar venceyada a un aria estratéxica de la casa conceyu, como por exemplu vivienda, y'que ye esti un de los grandes problemes de la mocedá.



Por otra parte, la estratexa fundamental de la izquierda de Xixón en materia de mocedá pasa pola participación. Poro, ye fundamental la potenciación del Conseyu de la Mocedá de Xixón como referente imprescindible de les polítiques pa la mocedá. Poro, p'acabar el procesu d'inclusión del Conseyu de la Mocedá de Xixón, y dotalu del reconocimientu y estabilidá necesarios, pa nosotros y nosotres sigue siendo irrenunciable pa esti próximu mandáu la creación d'una Llei de Participación Xuvenil que reconozca l'Estatus Públicu del CMX, con dependencia organizativa y de funcionamientu.

Tien de buscarse la estrecha vinculación ente'l CMX y la Casa Conceyu, mediante l'apertura del Ayuntamiento al Conseyu, de forma tala u'ésti seya participe y responsable del cumplimientu o non de les propuestes. Dende un puntu e vista a priori, va forzar al gobiernu municipal a cumplir coles polítiques de la mocedá mediante una carga de responsabilidad añadida en rrellación de grau direutu, que facilite, bien que se lleven que se desenvuelvan, bien qu'al nun ser satisfeches dexen ver les faltes con respetu a estes iniciatives con qu'efectivamente cuenta'l Partíu Socialista. Debe buscarse entós, vincular la responsabilidad política cola ciudadanía, faciendo de la participación ciudadana un ente interactivu, que fomente d'esta forma la cultura política a nivel local y facilite'l facer ver, ensin la obligación de pasar pelos medios de comunicación, el papel d'Izquierda Xunida-Bloque por Asturies-Los Verdes en tol l'ámbitu institucional.

Les nuses propuestes concretes pal mandáu 2007-2011 son les que vienen darréu:

VI.1.1. Vivienda.

- Creación d'un fondu subsidiariu pa la mocedá con efectiu de concesiones o incumplimientu de los plazos na vivienda protexida, entendiendo que la precariedá llaboral actual fai especialmente inestable'l mantenimientu regular de la renta o'l pagu de la vivienda
- Continuar y afonda na política de vivienda de los últimos años que garantice l'accesu a les memes pola mocedá.
- Proporcionar vivienda pública en renta en función de la renta percibida.
- Sofitar la creación de cooperatives de viviendes pa la mocedá.
- Restauración de viviendes antigües pa establecer una bolsa de viviendes de renta pa mozos y moxes a preciu baxu.
- Construcción d'una Residencia d'Estudiantes nel marcu de la Universidá Llaboral o nes cercanías del Campus Universitariu.
- Potenciar los servicios d'Información de Vivienda Moza (CMX, CIVE).



VI.1 2. Emplegu.

- Ellaborar un Plan d'Ocupación Xuvenil dientro de l'Alministración municipal.
- Compromisu del Conceyu de Xixón de non fomentar la precariedá; nun contratar empreses qu'utilicen empreses de trabayu temporal o tengan a los sos trabayadores en precariu.
- Garantizar la información y orientación sociollaboral.
- Gratuidá de los servicios públicos a tola la mocedá de menos de 30 años ensin emplegu, mediante un carné mozu que-yos permita l'accesu gratuitu a polideportivos y actos culturales.
- Crear un programa de formación xuvenil que garantice la inserción llaboral a la mocedá con titulación non especializada.
- Fomentar el cooperativismu xuvenil como fórmula a utilizar nos nuevos yacimientos d'emplegu.

VI.1.2.1 Busca de nuevos yacimientos d'emplegu: Mediu Ambiente, Padremóñu etnográfico y cultural...

Una bona midida entendemos que pudiera ser que, a través d'asociaciones y grupos ecoloxistes locales (intentando asimilar nel proyectu a los más posibles), formarase una sección municipal de conservación y resturación del padremóñu ecolóxicu xixonés, mediante la instauración del padremóñu ecolóxicu xixonés, mediante talleres xuveniles, infantiles, d'adultos, y el fomentu de la participación ciudadana mediante la instauración de brigaes de mozos y moces que trabayando a tiempu parcial (con facilidaes pa escoyer los sos turnos de trabayu, flesibilizándolos, faciéndolos asina atractivos y cómodos pa ellos, una remuneración, amás d'ufrir ventayes a estos grupos de trabayu en tolos servicios municipales (gratuidá del tresporte, gratuidá de los centros y instalaciones deportives municipales...). Éstos amás de facilitar la conservación del nuesu padremóñu natural, valdría pa prevenir incendios forestales, al traviés de la llimpieza de los montes, y valir como guíes a aquellos xixoneses y turistes que disfruten del nuesu privilexáu entornu natural.

Del mesmu mou que lo espuesto nel párrafu anterior, puéndese en poner en marcha otres brigaes empobinaes a la catalogación del padremóñu etnográfico y cultural de la zona rural del conceyu (molinos, horros, paneres, casones...) pa poder editar una guía coles pieces más interesantes y, incluso restaurar aquellos que tean deterioradaes.



Amás les yá actuales y consabíes polítiques municipales d'emplegu pa la mocedá, nosotros sumaríamos les mentaes nel presente documentu de fomentu de trabayu a traviés d'organismos por y pa la mocedá nos que los servicios universitarios como'l comedor-cafetería, que n'otres aries europees y incluso estatales tán yá emplegaes polos y les estudiantes.

VI.1.3. Movilidad.

Xixón pue presumir de tener una rede de tresporte públicu amplia y eficaz, única nes ciudaes del tamañu de Xixón. Y pa más motivu d'arguyu, prestada íntegramente pola alministración municipal. Dende Desde Izquierda Xunida-Bloque por Asturias-Los Verdes creyemos que se pue, y se debe, dir un pasu más allá nesta rede. Potenciar un tresporte públicu cada vegada más ecolóxicu ye, y tien de siguir siendo, una prioridá municipal.

El fomentu del usu del tresporte públicu tien de ser dalgo más que deseable, seya atractivu y, por ende, ventayosu pa la población y por supuestu pa la mocedá. El BUHO tien de tener un frecuencia de media hora a partir de la 1:00 de la mañana hasta l'entamu de les llinies regulares, mesmo los vienres como los sábados, cola fin d'evitar que la mocedá garre'l coche nes nueches de salida. Esti mediu tien de ser amás de baldre, o nel so defeutu, tener el mesmu preciu que les llinies regulares de tresporte.

Amás, proponemos la gratuidá del tresporte públicu pa la mocedá desemplegada, asina como pa los y les estudiantes de la ciudá.

VI.1.4. Xixón, ciudá de los y les Estudiantes.

Xixón habría erixise como modelu organizativu de referencia como ciudá de formación dientro d'Asturies. La falta de competencia a esti respetu ye total. Per un llau tán les ventayes coles que cuenta la ciudá y, d'otra la falta d'una competencia firme a esti respetu por parte de Mieres y la propia Uviéu. La capital del país cuenta con una organización defeutuosa de base y sobre too descuidada. Xixón pola so parte cuenta con unes carauterístiques que la faen ser privilexada. Esti aspectu tien de ser esplotáu. La mesma ciudá ye atrayente y cómoda no habitable pa los y les estudiantes, y ye a esti colectivu al que se-y tien de prestar atención, pos mediante'l colectivu estudiantil se pue impulsar el nome de Xixón como destín afayadizu d'estudios. Existen innumerables exemplos de ciudaes universitarias que son eso, ciudaes universitarias, pero que nos meses de branu vaciense al non poder ufrir la ciudá una alternativa llaboral temporal y d'ociu al so estudiantáu. Xixón nun tien esti problema, más bien tolo contrario, siendo rares les escepciones nel marcu del Estáu (Granada, Valéncia o Barcelona son quiciabes de les poques nes que se da esta situación), tando Xixón en capacidá de convertise na ciudá universitaria de referencia del norte de la península.



A los y les estudiantes habría que-yos proporcionar una reducción considerable que quedare como dalgó casi simbólicu'l tresporte universitariu o públicu nesti casu, siendo pa los y les estudiantes xixonese gratuitu, incluso estableciendo un llímite d'edá razonable que podría llegar a los 30 años (los 35 son la edá tope europea, nesti sen, los 30 tendríen sicolóxicamente un impactu igual o asemeyáu y supón una llende más sostenible pa estes polítiques).

Los y les estudiantes han cuntar con un programa de subvenciones d'estudios en dalgún grau, por exemplu, con un control nel preciu de les fotocopies, el tresporte públicu mesmu o reducciones nel café-comedor universitariu pa los y alumnes que cumplieren unos determinaos requisitos como puedan ser un bon espediente, una matrícula a pagar elevada (alredor de 1.200€), un determináu perfil familiar, accesu y información a bolses de pisos, etc.

Pola mesma, la ciudá nun ta preparada p'asimilar el númberu d'estudiantes que va tener nel futuru y con que n'efectu cuenta actualmente . Si bien les biblioteques permanecen semivacies durante 9 meses al añu, durante los otros tres, correspondientes a agostu-setiembre, xineru-febreru y mayu-xunu la situación que se rexistra yá nun ye de completa afluencia sinón d'hacinamientu propiamente dichu. La nueva biblioteca de la Llaboral non soluciona'l problema.

Pueda que l'apertura de centros d'estudios a la manera d'Uviéu seya escesiva, puesto qu'unque son práticos y ufren un serviciu de calidá, pueden resultar escesivamente costosos pal so usu real, debería considerase l'habilitar zones específiques nos Centros Municipales, o de llugares que puedan ser centros propiamente d'estudiu durante esos meses de mayor afluencia estudiantil y dá-yos un usu alternativu y igualmente útil durante'l restu del añu.

La potenciación de Xixón como ciudá universitaria daría un impulsu nuevu y revitalizador a la ciudá. L'ambiente de la mesma ye yá de por sí propiciu y atractivu: la universidá resulta anguaño una de les más prestixoses del Estáu Español nes aries de Marina Civil, Peritos y Telecomunicaciones, dotala de les infraestructures afayadices y necesaries conferiría-y nel curtiu-mediú plazu (unos 8-10 años) un nome a nivel estatal pudiendo facese un espaciu dientro de la mesma Europa al tar nestos momentos en periodu de reforma de los programes educativos pa facelos uniformes en tol espaciu políticu del continente, lo qu'a la so vez atraería a nuevos estudiantes y mozos y moces, polo que va ser necesario impulsar los programes d'intercambiu o movilización europeos cola universidá y ciudá de Xixón tipu'l programa ERASMUS. Too ello ha poder atrayer a nueves empreses demandantes de tiulaos y titulaes con altu nivel formativu, incluso y coles ventayes comparatives que yá ufre la ciudá (ye industrial, ta bien localizada...), sería un estímulo más pa la implantación empresarial.



Otra de les propuestas que plantegamos ye la de vertebrar definitivamente'l Campus de Viesques, que cola integración de la Universidá Llaboral quedó completáu. Amás, nun futuru non mui llonxanu, la construcción de la nueva vía d'accesu a la zona del Hospital de Cabueñes prullongando l'Avenida d'Albert Einstein per detrás del antiguu INTRA, va facer que la carretera N632 queda lliberada de tráficu, lo que va facer que'l Campus seya un espaciu completamente pacificáu nesti sen. Poru, p'algamar que la zona universitaria quede integrada, proponemos la creación d'un mediu de tresporte qu'interconecte los distintos edificios del Campus, dende Peritos hasta la Llaboral, como exemplu un mini-tranvía. Otra de les opciones, sobre too pa les épocas de bon tiempu, diba ser la d'instalar un serviciu de préstamu de bicis, como l'esistente na ciudá, al que s'accediera de forma gratuita a través del carné d'estudiante.

Tamién diba ser interesante estudiar la integración nel Campus Universitariu de la Formación Profesional, aumentando la ufierta yá esistente na Universidá Llaboral. Por exemplu, paeznos un contrasentíu que la carrera de Telecomunicaciones tea nel Campus y los estudios de FP de la mesma rama impártanse nel centru la ciudá, yá que podríen aprovechar espacios comunes pa les dos modalidaes.

Amás, ye imprescindible la creación d'un nuevu edificiu de Servicios pa los y les estudiantes, que contenga nes sos dependencias espacios d'usos múltiples pal desarrollu d'actividaes, sales d'estudiu, información de los servicios pa la mocedá y un comedor de titularidá y xestión pública. Esti edificiu convertiríase en referente pa los y les estudiantes y-yos daría espacios agora inesistentes nel Campus.

Por último, y lloñe de querer cayer en localismos absurdos, creyemos que dende la Casa Conceyu se tien de reivindicar el cambiu de nome pa la Universidá, pasando a denominase "Universidá d'Asturies", pa que tolos y toles asturianos sintamos esta institución como de nueso y como seña d'identidá del nuesu país.

VI.1.5. Salú.

- Instalación de taquilles pa material escolar nos centros educativos.
- Facilitar l'accesu a la información y asesoramientu en materia de salú, sexualidá y drogues, potenciando los programes de prevención nes escuelas y los de reducción de riesgos nos sitios d'ociu, como Zona Clave.
- Incrementar y potenciar los programes de prevención de la salú dentro de la familia, les empreses, les asociaciones y la mocedá d'enseñanza primaria y secundaria.
- Facer campañes informatives de nos centros educativos y barrios sobre educación sexual y sobre llibertaes sexuales.
- Instalar máquines espendedores de condones en tolos centros d'enseñanza secundaria y n'otros sitios públicos.



- Mayor inversión na rehabilitación de toxicómanos.
- Apoyu a programes que desarrollen unidaes móviles itinerantes, d'analís de sustancies nos sitios de consumu avezáu durante los fines de selmana, como Zona Clave.

VI.1.6. Cultura, ociu y tiempu llibre

- Apoyu a les manifestaciones culturales más específicamente xuveniles mediante la organización de circuitos, alcuentros de perfeccionamientu, mesmo por parte de la Universidá Popular, como por otros entes. Potenciación del Espaciu Astragal como referente del Arte Mozo Xixonés.
- Promoción de la mocedá creadora nel ámbitu individual y colectivu, dando-yos a conocer a la sociedá y ufriéndu-yos les instalaciones necesaries pa desenvolver el so proyectu. Equí de nuevu cabe señalar l'Espaciu Astragal como preséu fundamental pal desarrollu d'estos obxetivos.
- Aumentar notablemente les dotaciones bibliográfiques de les diferentes biblioteques de los centros municipales.
- Promoción del deporte base.
- Apuesta por programes d'ociu alternativu desarrollaos dende la Casa Conceyu y los movimientos sociales.

VI.1.7. Asociacionismu y participación.

- Incrementar les subvenciones pa organizaciones xuveniles, estableciendo esti apartáu presupuestariu como partida finalista..
- Facilitar tolos trámites burocráticos pa la creación d'asociaciones y el so accesu a les subvenciones municipales.
- Demanda d'una llei de Participación Xuvenil dende l'ámbitu municipal.
- Difundir ente la mocedá los mecanismos de participación ciudadana.
- Fomentu de la participación estudiantil nes elecciones a Consejos Escolares, garantizando la participación del estudiantáu nel gobiernu de la comunidá educativa.



VI.1.8. Conseyu de la Mocedá de Xixón.

- Creación de la llei de Participación y promoción Xuvenil qu'ampare l'estatus públicu del Conseyu de la Mocedá de Xixón.
- Reconocer al CMX como órganu consultivu de les polítiques de Mocedá que se desenvuelvan dende la Casa Conceyu dende cualesquier de los sos ámbitos. Esto significa la presencia del CMX en cualesquier Conseyu d'Alministración d'Empreses Municipales, Patronatos, etc.
- Apoyu al Conseyu de la Mocedá de Xixón como espaciu abiertu y coordinador d'actividaes, promoviendo la so autoxestión y independencia.
- Inclusión d'una partida empobinada al CMX dientro de los Presupuestos Xenerales del Ayuntamientu, dependiendo direutamente de la Intervención Municipal.
- Convertir el CMX en coordinador de los Centros de Recursos pa la Mocedá esistentes na ciudá.

VI.1.9. Dos propuestes nueves pa Xixón: Creación del "Llar Mozu y un nuevu Albergue Xuvenil.

a) Llar Mozu.

Dalgo que consideramos útil y necesariu pa una ciudá cola vida xuvenil que tien la ciudá de Xixón sería la creación d'una Casa de la Mocedá, que podría denominase "Llar Mozu". Otres aries del estáu como Palencia yá tienen una, a pesar de tener una vida social y xuvenil sensiblemente inferior y notablemente menos activa que la d'Asturies, y más concretamente Xixón.

La mocedá tien de tener un espaciu onde poder desenvolver toa triba d'actividaes creatives o d'esparcimientu, de tipu asociativu o ensin formalizar. El recintu ferial (o zona adyacente) podría ser un sitiu más qu'aptu pa estes actividaes, trataráse d'un recintu ampliu, espaciosu, con edificaciones durante l'añu a penes emplegaes y que pudieren ser fácil y económicamente aprovechables. Tamos refiriéndonos a una apertura d'instalaciones al serviciu de la mocedá, conferi-yos unes infraestructures aptes pa la realización d'actividaes lúdiques, semiprofesionales o amateurs, como puedan ser grupos teatrales, grupos musicales, grupos artísticos, asociaciones de diferente calter, grupos d'amigos ensin mayores fines, etc. L'aclimatización podría cuntar cola edificación d'un escenariu nuna sala de conciertos y otres actuaciones, insonorizada y bien equipada, sales de conceyos, d'estudiu y llectura, videu proyecciones... La xestión debería en cualesquier casu correr por parte del Conseyu de la Mocedá, que contrataría a un grupu de mozos y moxes pa l'alministración y xestión del espaciu.



Dende esti espaciu, podría potenciase la busca d'actividaes alternatives d'ociu nocherniegu venceyaes a esti organismu. Nel "Llar Mozu" podríen fomentase y impulsase talleres d'actividaes pa tou tipu d'edaes, lo que diba suponer contratar monitores deportivos o de tiempu llibre recién llicenciaos y cola necesidá mesmo de trabayar como d'adquirir esperiencia y currículu llaboral.

El "Llar Mozu" (y los centros d'esi estilu), tien de buscar la participación activa de la mocedá, fomentando l'actuación de grupos locales, bien seya de música o d'otra manifestación cultural, con actuaciones nestos espacios de forma regular. Dalgo que va dar posibilidaes a esto podría ser un abaratamientu de los costes de les consumiciones. N'Italia, los locales xuveniles tán más que desenvueltos, con amplies infraestructures y presencia estable y xeneralizada nos barrios de les ciudaes. Les actividaes nestos sitios, mui frecuentaos pola mocedá, básase nesta idega de creación d'un espaciu llibre y propiu, creativu, n'onde se realicen actuaciones en determinaos díes de grupos locales. Esto tien de desenvolvese nuna ciudá como Xixón.

Na idega de los espacios xuveniles tien d'insistise fuertemente, y pue que nun abaste pa una ciudá de l'actividá de Xixón colo yá propuestu. Dende los y les moces d'IX-BA-LV diríemos más allá. Un espaciu social nel que non sólo la mocedá (aunque tien de ser una prioridá) puedan aconceyar y facer y sobre too promover les sos actividaes. Un espaciu de la ciudadanía que tien de ser ubicáu nun sitiu céntricu por supuestu, pero a la vez emblemáticu, un edificiu que tea popularmente consideráu como históricu de la ciudá. Un teatru pequeñu que funcionara igualmente como sala de cine podría ser un bon atractivu, onde pudieren mesmo ser tanto representaes obres locales, como ciclos de cine européu, oriental, clásicos o proyectar les películes del Festival de Cine y de pasaes ediciones nun sitiu más aptu y bien situáu pa esi fin qu'onde esto actualmente se fai como'l centru Xixón Sur. Un sitiu de pasu céntricu y polo tanto enormemente frecuentáu tien de facer funcionar por una necesidá estes iniciatives que tán mui presentes na mente de la mocedá xixonesa.

b) Albergue xuvenil.

La edificación d'un Albergue Xuvenil, con barracones acondicionaos pa grupos y excursionistes y visitantes xuveniles en tránsitu con precios populares orientaos al recibimientu d'esto colectivos, habría ser un deber pa la pa la próxima llexislatura. Ente la infraestructura del enclave podría cuntar con talleres pa la realización de cursinos profesionales homologables, del INEM, universitarios o del tipu que seya, pero principalmente orientaos a la mocedá. Podría incluso baraxase la posibilidá d'establecer un campamentu municipal pa grupos de toa Asturias durante una quincena en branu o en cualesquier otru periodu vacacional. Existe amás un amplísimu espectru de turismu xuvenil que nun vaya a dexar dividendos na ciudá y faga un turismu "mochileru" bien pel camín norte de Santiago, bien pela costa asturiana, o bien per senderismu y monte. A esti ampliu espectru tien de se-y ufrir un sitiu con precios absolutamente populares que ronde los 5 y 7 euros, a la fin de facelo lo más accesible posible.



Una zona óptima pal so emplazamientu diba ser la zona de Viesques, próxima a la Llaboral, pos cuenta con delles infraestructures aprovechables y espacios susceptibles d'acoyer edificaciones en sintonía y pa facer actividaes nel entornu.

Actualmente la mesma Unión Europea fomenta un programa de mocedá que dota de subvención y financiaciones cola fin de facilitar la implantación d'esti tipu de centros. Nun esiste actualmente una sola Casa o Albergue de la Mocedá d'este corte en tol norte peninsular, y esto tien de ser aprovecháu.

VI.2. POLÍTICA DE LA MUJER

Izquierda Xunida-Bloque por Asturias-Los Verdes apuesta por una política local qu'integre'l Mainstreaming de xéneru entendíu esti como la organización, la meyora ésti como la organización, la meyora, el desarrollu y la evaluación de los procesos políticos, de mou que dende una perspectiva d'igualdá de xéneru, incorpórese en toles polítiques desarrollaes nel conceyu, a tolos niveles y en toles etapes, polos actores normalmente involucraos na adopción de midíes polítiques".

Pa ello los obxetivos políticos municipales d'Izquierda Xunida-Bloque por Asturias-Los Verdes pasen por:

- Garantizar el principiu d'igualdá.
- Evitar la reproducción de polítiques que fomenten la desigualdá de los servicios.
- Aumentar y optimizar los recursos de protección de la muyer nos casos d'agresión y violencia de xéneru que garantice la seguridá de les víctimes.
- Nueves maneres d'idear y enfocar les polítiques. (Análís obligatoriu de la pertinencia de xéneru en cualesquier actuación, programa, proyectu, política, etc. Municipal).

VII.2.1. Polítiques actives d'Emplegu:

Fomentar la flesibilización de les xornaes llaborales favoreciendo aquelles empreses que meyoren los convenios colectivos más allá de lo establecíu llegalmente na Llei de Conciliación de la vida personal y llaboral.

Que l'Ayuntamientu de Xixón estableza la flexibilización de xornada de trabayu pa la conciliación personal y llaboral, como exemplu empresarial. Adecuar los horarios llaborales de los planes d'emplegu dependientes del Ayuntamientu a les xornaes escolares (na hora d'entrada), teniendo en cuenta'l número de families monoparentales.



Potenciar la oferta d'emplegu dende la Casa Conceyu ensin perpetuar el rol de la muyer como cuidadora y como prorrugación del trabayu domésticu, abriendo iniciatives d'emplegu diverses y acordes col sector industrial na nuesa ciudá.

Crear colos programes europeos y conxuntamente, cola Axencia Local de Promoción Económica y Emplegu nel Parque Científicu-Tecnolóxicu de Xixón, un departamentu d'investigación pa proyectos realizaos por muyeres.

Campaña de difusión de la normativa en materia d'igualdá y de la Llei contra la violencia de Xéneru nel entornu llaboral.

Fomentar la creación d'emplegu en materia asistencial (Ayuda a domiciliu, cuidaos de persones dependientes), que favorezan mesmo la entrada al mercáu llaboral de la muyer, como'l facilitar a los y les trabayadores n'activu la conciliación de la so vida personal y llaboral. Nesti sen, creación de la Empresa Municipal d'Atención al Dependiente que se faga cargu de l'atención d'estes persones pa que la muyer que los atiende pueda incorporase al mercáu llaboral.

Potenciar la entrada, nes mesmes condiciones que los homes, de les muyeres a los puestos direutivos de les empreses, asina como favorecer la formación y los ascensos d'estes.

Cuantificación económica municipal pa favorecer iniciatives d'emplegu de muyeres (cooperatives, empreses d'inserción sociu-llaboral, etc.), tutelando dende'l conceyu, l'acompañamientu a la iniciativa, favoreciendo a muyeres en riesgu social, y favoreciendo la iniciativa empleadora en muyeres de 50 a 65 años, asegurando asina cotizaciones mínimes a la Seguridá Social.

VII.2.2. POLÍTICAS ACTIVAS DE SALÚ

Nes patoloxíes qu'afecten a les muyeres, la investigación y tratamientu de la fibromialxa. Realizar programes municipales de prevención y educación pa la salú.

- Campaños d'educación sexual pa la ciudadanía.
- Campaños específiques qu'eliminen traumes innecesarios por situaciones biolóxicos que repercuten na autoestima de les muyeres.

La violencia contra les muyeres ye un de los factores que manquen mesmo a la salú física como psicolóxica de les mesmes, polo que se fai imprescindible la formación de personal téunicu sanitariu pa la detección de les causes asina como pa l'atención adecuada a les víctimes. Ello fai necesariu que se desenvuelvan les siguientes propuestas:

- Puesta en marcha de programes comunes de formación pa la igualdá y contra la violencia de xéneru ente la Conceyalía de la Muyer y los servicios sanitarios de la nuesa ciudá.
- Apoyu y puesta en marcha de programes de terapias de reencuentru nos centros de salú, con conteníu de xéneru.



- Desenvolver programes orientaos a la identificación de delles patoloxíes mentales cróniques con situaciones de violencia familiar. Desarrollu de la Llei contra la Violencia de Xéneru.
- Formación especializada p'aquellos puestos de trabayu en rellación cola violencia de xéneru.
- Axilizar los trámites pa la disposición de los medios de protección –teléfonu- pa usu inmediatu por parte de la víctima u otros medios más eficacies.
- Formación especializada del personal xurídicu (lletraos/es qu'atienden el turnu d'oficiu, xueces...).
- Axilización de la celebración de los xuicios de lo penal nos casos de violencia de xéneru.
- Disponibilidá d'espacios y medios técnicos abondo que garantice la privacidá y axilidá na resolución de la denuncia.

VII.2.3. Polítiques actives na educación

- Orientar a la población escolar hacia una formación profesional non sesgada de xéneru.
- Visibilizar la hestoria y les aportaciones de les muyeres na educación y na investigación.
- Creación en tolos barrios de centros escolares pa los cursos de 0 a 3 años, compatibilizando asina la vida personal y llaboral de los padres y madres.
- Creación d'un serviciu de "canguros" con horarios llaborales non coincidentes colos horarios escolares.
- Incorporación d'Axentes o Técnicos d'Igualdá nos Colexos, Institutos y escuelas de 0-3, que velen pola educación en planu d'igualdá de los/es neños/es. Ente otres funciones van tener la de poner en funcionamientu programes de formación pa personal docente, padres/madres, en materia d'igualdá, revisar los testos didácticos, actividaes, etc., dende la perspectiva de xéneru.
- Acreditación pa los profesionales de la enseñanza na formación pola Igualdá y contra la violencia.
- Programes de coeducación y campañas de sensibilización que promuevan la corresponsabilidá ente homes y muyeres nos trabayos domésticos y de cuidadores.
- Usu obligatoriu del llinguaxe non sexista y escluyente.



VII.2.4. Servicios Sociales

- Programes de formación pa la igualdá y contra la violencia de xéneru a les persones dedicaes a l'atención de la ciudadanía.
- Promocionar proyectos locales d'atención integral.
- Creación d'una comisión de siguimientu y valoración, dende la perspectiva de xéneru, de los dispositivos d'intervención social.
- Polítiques sociales de sofitu a la unidá familiar: centros de día, viviendes sociales pa muyeres soles con cargues familiares, etc.
- Creación d'una llinia d'actuación, d'oficiu, dende los Servicios Sociales Municipales y Bienestar Social pa les persones mayores y/o discapacitaes cola fin de tener un conocimientu real y un siguimientu regular qu'evite situaciones de riesgu.

VII.2.5. Participación política:

- Establecer les midíes de conciliación oportunes pa incentivar la entrada nel mundu sindical y políticu de la muyer.
- Presencia de la Conceyalía de la Muyer na Xunta de Gobiernu.
- Cambiar los estatutos del Conceyu de la Muyer pa que cada dos años asuma la Presidencia una Asociación de Muyeres de forma rotativa.
- Desvincular les actuaciones del Conceyu de la Muyer de les actuaciones Municipales.
- Dotar de conteníu los puestos de trabayu de les Axentes y Técnicos d'Igualdá qu'esisten na actualidá, asina como favorecer la formación y entrada al mercáu de trabayu de más persones nesti campu llaboral.
- Alcuerdos colos medios de comunicación que favorezan la desapaición de los estereotipos sexistes.



LA MEMORIA NECESARIA

Porque tolos republicanos d'España tenemos los güeyos abiertos a los sueños. Yo camiento que mos llevamos la llei que fai al home vivir en común, la llei de la vida diaria, fermosa verdá transitoria. Llevámosnosla ensin sabelo, prendida nos traxes, nos llombos, ente los deos de les manes... Somos homes y muyeres obedientes a otra llei y a otra xusticia, que nada tenemos que ver colu que vieno y a otra xusticia, que nada nun tenemos que ver colu que vieno y se fizo señor del solar de nueso, de los nuestos ríos, de la nuesa tierra. De les nuses ciudaes. Nun sé si se dan cuenta los que quedaron per allá, o nacieron depués, de quienes somos los desterraos d'España. Nosotros y nosotres somos ellos y ellas, lo que van ser cuando se restableza la verdá de la llibertá. Nosotros y nosotres somos l'aurora que tán esperando.

María Teresa León. Memoria de la Melancolía.

Pa Izquierda Xunida-Bloque por Asturias-Los Verdes la sociedá xixonesa tien que se reflexar y reconocese nes metes y los valores democráticos que defendieron los y les republicanos y republicanas. Les sos escaecies biografíes de llucha pola llibertá han ser un exemplu irrenunciable de valentía personal y coraxe cívicu. N'otros países averaos, esta resistencia foi clave pa forxar nociones democrátiques fundamentales como les de "pueblu" y de "ciudadanía". Ye por eso polo que, por razones de cultura política básica queremos proponer una riestra de midíes que deberíen ser llevaes a cabu pol Conceyu de Xixón cola fin de dir recuperando la Memoria Histórica.

1. Velar pol cumplimientu del marcu xurídicu y internacional pa la busca de desapaeciós y desapaecies, mesmo del periodu de la guerra civil como de la posguerra, promoviendo oficialmente les inestigaciones y exhumaciones d'alcuertu colos protocolos internacionales fechos polos arqueólogos, antropólogos y forenses.
2. La creación, dientro de la Fundación Municipal de Cultura, d'un equipu d'estudios sobre la memoria histórica de la Guerra Civil y la Dictadura na enseñanza obligatoria, que permita entender el cómo y el porqué del escaezu. Programar, nesi sen, actividaes estraescolares colos alumnos/es de Xixón pa recuperar la Memoria.
3. El reconocimientu oficial del papel de los y las republicanos y republicanas que pusieron les primeres piedres de la nuesa democracia cuando en payeres de 1.933 se celledraron les primeres eleccionen con sufraxu universal masculín y femenín. Una data fundamental qu'habría ser conmemorada oficialmente como lo vien siendo nes principales democracies del mundu.
4. La señalización de toles obres públiques o privaes construyies por presos políticos, asina como los llugares nos que munchos y munches d'ellos y elles fueron asesinaos y asesinaes.
5. La realización d'un gran actu públicu de reconocimientu pa tolos homes y muyeres que llucharon pola defensa de la llibertá y la democracia al llau de la II República, na que participe la Casa Conceyu de Xixón.
6. Realización d'un monumentu nel cementeriu d'El Sucu n'homenaxe a los homes y muyeres que yacen nes cuatro foses comunes esistentes.

